

SOU IAKE RERIHONI YESUS WANI MARKUS IKANUI

Yohanes ia mamsohu heu rosau iseka tau arena osi Yesus

1 ¹ Au nanie uruni rerihoni Sou lake nene aikune. Sou lake reini mo, nene aikune rerihoni Yesus. Ia mo, Anahatana Iratiki na lapuheu Mansia. Ia mo, Anahatana Anai. ² Sou lake rei nene aikune wani sani masuae wani ia mamsima runa Anahatana ne maunauna isa waini nanai Maleakhi ikanui. Ikanu ata Anahatana iasau sanrei,

“Mka uaisosi we ia maisosie na ianaone, ano tau muie,
na ia rei iaunauaso, nooi sani iseka tau arena osia.”

³ Oyo ia mamsima runa Anahatana ne maunauna isa honu, waini nanai Yesaya, ikanu ata Anahatana iasau sanrei,

“Ia isa nioi iakaona pani otoa huie sanrei,
‘Sani sio oseka tau arena osi ia mainae,
aunauaso rerihoni au, na oatinu tau Upuri
sani ouna arena katopue mka ieu.’”

⁴ Yesaya ikanui sanrei, areimo sani Yohanes ihokai pani otoa huie. Ihokai na isohuso tau tihu na sio umau onoo ata oarihoni no rosau nea. Iaunauaso sanrei, “Oarihoni mo rosau na Anahatana isiru heu mo rosau rai. Oarihonire, oyo usohumo.”

⁵ Mansia pusiki sui otoa Yudea runa kota Yerusalem ohoka, nanie oatinu Yohanes ne maunauna. Oamanaku no rosau, oyo Yohanes isohuso pani Wae Yordan.

⁶ Yohanes mo, iausahu papite wani ounai arihoni unta nene unte. Inene koropou unte pani ahai. Iai kauka runa kilalan wesie. ⁷ Iaunauaso sanrei, “Mka ia isa ihokai tau muie. Ia reimo mka ne kawasa mainae erenesi au. Au mo, au mainae tewa. Reiso ukanahata na unusu ne sanraliu arihoni aini atua mani iae, iake tewa oi.

⁸ Usohumo tau tihu na sio onoo ata oarihoni mo rosau nea. Ne ia saoro mka irui Anahatana Ne Inaha osimo.”

Yohanes isohu Yesus

⁹ Oyo Yesus ihokai on poe nia Nazaret poe otoa Galilea, samatoro Yohanes isohui ria Wae Yordan. ¹⁰ Isohui pusi oyo, Yesus ihokai arihoni waene rei, inoo nante erehekai. Oyo Anahatana Ne Inaha isipui. Anahatana Ne Inaha rei mo, nooi sani manu puane, samatoro inusui pani Yesus. ¹¹ Inusui oyo, oatinu nioke isa on roe noiyaha ereasau sanrei, “Ano mo, au anaku wani anoku runaya. Anoku iake tau ano.”

¹² Mata huni tewa oi, oyo Anahatana Ne Inaha iaisosi Yesus ieu ria otoa huie.

¹³ Reiso iruei ria rei onona hutu ate. Oyo ia aia sakahatene iakarotai na ipusui. Bintang seana warora rei oi. Ne sio maisosia on roe noiyaha ohoka oakahaiki.

Yesus ioi sio mamhikua ate

¹⁴ Sio oaresi Yohanes nea, oyo Yesus ieu poe otoa Galilea. Ieu poe rei nanie isima runa Sou lake wani on roe Anahatana. ¹⁵ Hoka poe oyo, isima iahata, “Potuina tewa oi, oyo mka Anahatana irime tuniai reini. Oarihoni mo rosau. Oparisaa tau Sou lake wani on roe Anahatana.”

¹⁶ Yesus waini ieu ipusu Wae Galilea nusue, oyo inoo sio mamhikua ua. Sio ua reimo Simon runa wanini Andreas. Uaso wasoni ohiku onina ikae. ¹⁷ Yesus iasau osiso iahata, “Oeu mai na oeu opusu au. Mka uatuhetemo na oeu ohiku tumata osiku.”

¹⁸ Oyo oarihoni no ueta rai sirinia, samatoro oeu opusu Yesus.

¹⁹ Yesus ieu hainau mkane, ita inoo Zebedeus ne hehuka, Yakobus runa wanini Yohanes. Uaso wasopani arupae anoe oseka tau no ueta. ²⁰ Oyo Yesus isoiso rei sirinia. Reiso oarihoni noa ama pani arupae anoe rei runa sio umau honu. Oarihoniki runa sio wasoni isehaso na opakarian osiki rei. Oyo uaso oeu opusu Yesus.

Yesus inei sakahatene arihoni tumata

²¹ Yesus runa ne mampusua oeu rotu-tu ohokaso pani kota Kapernaum. Tau ranie hatae wani iaranahata isa, Yesus inusui pani sio Yahudiu no numa manoune, nanie iatuhete noi rei. ²² Sio wasoni oatinui rei, osira tau ne matuhetene rei. Tau ia mo, iatuhete runa ne kawasa. Iatuhete sani sio matuhete Musa ne maunauna tewa.

²³ Oyo ia isa waini iauwena runa sakahatene inusui pani numa manoune rei, oyo iakapona iahata, ²⁴ “E, Yesus, ano Nazaret. Nanie auna sae tanuma reini? Ahokaya nanie ahunuma si? Uaneia nea. Ano mo, ano manisate onate. Ahokaya on roe Anahatana!”

²⁵ Ne Yesus ihesa tau sakahatene rei. Iahata, “Amaturua! Ahokaya arihoni ia reini.”

²⁶ Reiso ia rei ikananunu tau sakahatene rei eresuniki, oyo iasanoata, oyo sakahatene rei erehokai arihoni rei sirinia. ²⁷ Erehokai oyo, sio pusiso osira hunu ruao. Reiso oasei mai umau oahata, “Ira, oe! Sae reini? Matuhete honue maa! Tau ne kawasa inei sakahatena, oyo rahokaso rapusu ne maue rei sirinia, tea!”

²⁸ Reiso mata huni tewa oi, oyo sio pusiso sui oteo Galilea oatinu rerihoni Yesus.

Yesus isuisene sio panesi

²⁹ Yesus ikata Yakobus runa Yohanes, oyo tonuso ohokaso oarihoni sio Yahudiu no numa manoune rei, samatoro oeuo poe Simon runa Andreas no numa.

³⁰ Simon inai hanahanai waipo inekai tau ikupui. Reiso osima runa ne kupue rei osi Yesus. ³¹ Reiso Yesus ieu poe iakahuu ia pina onate hanai atue, samatoro iakahaiki ihitioi. Oyo ia pina onate rei, ne kupue iake rei sirinia. Ia iake nea, reiso inana muaine na ipanaso.

³² Nene manin ruru rei, oyo sio panesi orori sio kupua runa sio wasoni oauwena runa sakahatena. ³³ Reiso sio niane hahae rei pusiki, pusiso oamanouso haineke Petrus ne numa mitanunue. ³⁴ Oyo Yesus isuisene sio panesi wasoni osupu kupu nita-nitaya, inei sakahatena. Ne isopo sio sakahatena rei na pene oanamana. Tau oanei ata ia mo, ia seia.

Yesus iaunau pani oteo Galilea

³⁵ Nene hanroe omnano tunne sanrei oyo, Yesus ihanui. Ihanui oyo ieu iarihoni numa rei. Ieui na roe oto huie isa nanie ianamana runa Anahatana. ³⁶ Ne Simon sio oeu oninai. ³⁷ Oeu oninai, oyo osupui. Osupui, oyo oasau osiki oahata, “Sio pusiso wasoni oeu oninaya rei!”

³⁸ Ne Yesus iasau osiso iahata, “Mai, na ieuta sui nia tamena sui oteo Galilea reini. Na uaunaso oi. Tea mo, uhokaku mai rei mo, tau rei, tea!”

³⁹ Reiso Yesus ieu ihori oteo Galilea rei pusiki. Ieu iaunau sui sio Yahudiu no numa manouna runa ieu isuisene sio wasoni oauwena runa sakahatena.

Yesus isuisene ia muhune

⁴⁰Kami sepakat untuk memakai kata Tuhan untuk semua rangkaian cerita, walaupun dalam cerita itu memakai nama "Allah". Taue isa ia muhune isa ieu pani Yesus. Hoka pani, irike tune iakapuni Yesus aini isopa ikokuroui. Oyo iainisi na Yesus isuisenei. Iahata, "Upu. Sani me maue mo, mai na asuiseneku, areimo ano me kawasa asuisene."

⁴¹Yesus anoi runai reiso iakahuui oyo iahata, "Iake. Usuisenea nea."

⁴²Ranie hatae rei sirinia, oyo kupue rei rerihtoniki rei sirinia. Kupue rei rerihtoniki, oyo ia muhune rei iake rei sirinia. ⁴³Oyo Yesus iaisosiki ieu. Iasau osiki iahata, ⁴⁴"Anomu erepeka. Asupu sio umau mo, pene aruni. Ne aeua pani ia mamkenu makapanau osi Anahatana isa na ainisi na iariniia. Arui manua ua osiki na ikenure osi Anahatana sani Musa iaunau rei. Tau rei, sio pusiso mka oanei ata ano iake nea."

⁴⁵Ne ipusu Yesus ne maunaune rei tewa. Ieu suru ria, suru nau iruni osi sio panesi. Iahata, "Yesus isuiseneku."

Reiso iruni suru ria, suru nau rotu-tu Yesus inusu niana iau-iauhuniki mani. Iruui iauhuniki pani niane muie mani. Ne sio on ria, on nau ohokaso mai tanui sui osa sirinia.

Sio oamanaru Yesus tau iasau ata ne kawasa isiru heu rosau

2 ¹Yesus isuisene ia muhune pusi, oyo nene onona ate sanrei, inuniki pani kota Kapernaum. Sio panesi onooi, reiso osima osi umau. Oahata, "Yesus waipani ihokai nea."

²Reiso sio panesi ohoka oamanouso haineke numa rei rotu-tu sio umau mo, osupu naniao tewa nea. Pani muie, haineke mitanunue iae, sanrei sirinia. Sanrei oyo, Yesus iaunauso tau maunauna waroni on roe Anahatana. ³Oyo sio ate ohokaso orori ia talae isa, nanie ororiki mai Yesus. ⁴Ne sio panesi rei onetesos. Reiso oeu mai tanui iake tewa. Reiso osaa roe numa hahae, samatoro onosu ainataya waroni ranete numa rei, oyo oratiki tau ne kinoe poe Yesus. ⁵Oratiki oyo, Yesus inoo ata sio rei oparisaa ata ia imaha heu kupue rei. Ta san rei oyo, Yesus iasau mai ia talae rei iahata, "He anaku, me rosau, usiru heure nea."

⁶Ne sio matuhete Musa ne maunauna umau wasoni oru-rueso pani rei. Oatinu Yesus ianamana san rei, oyo oasei pani anoo oahata, ⁷"Ia mo, masike nai osa, ianamana sanrei. Nooi sani ia mo, Anahatana rei. Ia seia sahoro imaha isiru heu rosau sani Anahatana? Anahatana ruai sahoro imaha isiru heu rosau."

⁸Ta sanrei oyo, Yesus ianei sio rei anoo. Reiso iasau osiso iahata, "Omi nanie oasei pani anomo sanrei, nanie tahae?" ⁹Sani uasau osi ia talae reini, 'Me rosau, usiru heure nea.' Ne sapani na oanei ata kani usiru heure te tewa? Ne sani uasau osiki, 'Ahanua, ahetu me kinoe rei, oyo ruamu aeu.' omi mka oanei ata au we kawasa usuisene. ¹⁰Ne muie reini, unina na oanei ata, mai tuniai reini, Au, Tumata Reini, Anahatana Ihitiku, we kawasa usiru heu rosau."

Oyo Yesus iasau osi ia talae rei iahata, ¹¹"Uasau osia, ahanu, ahetu me kinoe rei, na anunia."

¹²Oyo ihanui, ihetu ne kinoe rei, oyo ihokai. Sio pusiso onoo ihanui, ihetu ne kinoe rei. Reiso osira. Oainaa runa Anahatana oahata, "Mania upu Anahatana. Ano mo, ano iake tunne nai osa. Ano me kawasa mainae. Una nitae reini mo, ami anoo tewasi."

Sio oamanaru Yesus tau iaiki ikata sio kahatena

¹³ Yesus isuisene ia talae isa pusi, oyo ieui pani Wae Galilea honu. Ihokai pani waene nusue, oyo sio panesi ohokaso mai tanui na iatuheteso. ¹⁴ Ta Yesus waini ieu ipusu arena pani rei, oyo inoo ia mamnana pea isa waipo iruei poe numa mamnana pea. Ia reimo, nanai Lewi. Amai tau Alfeus. Sio mamnana peau oakahai sio Romau oeu oamanou peau arihoni sio Yahudiu. Sio Romau rei otapiso oakapena na onana kepeni umau osi sio ruao oi. Reiso sio Yahudiu openeso tanuso. Sio oahata sio mo, sio kahatena nai osa sani sio kimanakana. Yesus ioi ia rei. Iahata, “Aeu mai na apusu au.”

Yesus ioiki oyo ithio ieu ipusu Yesus rei sirinia.

¹⁵ Yesus waini iaiki pani Lewi ne numa, oyo sio mamnana pea runa sio wasoni nusa niane oahata sio kahatena umau rei ohoka oaiso okata Yesus runa ne mampusua oi, tau sio panesi wasoni oeu opusu-pusui oi. ¹⁶ Sio matuhete Musa ne maunauna arihoni sio ona akama Yahudi onoo Yesus iaiki ikata sio mamnana pea runa sio wasoni nusa niane oahata sio kahatena rei. Reiso oasei tau Yesus ne mampusua oahata, “Omi mo matuhetene rei nanie iai ikata sio mamnana pea runa sio kahatena rei, nanie tahae?”

¹⁷ Iahata, “Sani ia mamsuisene isuisene sio iaka tewa, ne isuisene sio kupua, au oi uhokaku tewa uanaha runa sio wasoni oahata sio ruao, sio manisata. Ne uhokaku uanaha runa sio kahatena.”

Sio oamanaru Yesus tau ne mampusua oamaoni tewa

¹⁸ Taue isa Yohanes Ia Mamsohue ne mampusua runa sio ona Farisi pusiso wasoni oamaoni. Oyo sio umau ohokaso mai Yesus, nanie oasei tanui. Oahata, “Yohanes ne mampusua runa sio ona Farisi no mampusua oamaoni. Ne ano me mampusua mo, oamaoni tewa. Oamaoni tewa tau sae?”

¹⁹ Iahata, “Tau sio mausahaya oaiseneso, sio wasoni opusu maisene rei oamaoni te tewa? Munata ia hehuke waini ikata sio asi, oaiso sirinia, tea! Oamaoni iake tewa. ²⁰ Ne mka sio umau osota ia hehuke rei, samatoro sio wasoni noi maisene rei oamaoni iake.

²¹ Sio oaturuu papi monae tau nipa sini honue tewa. Tea mo, mka opapa papite rei oyo, erenunui, oyo papite rei wakihai mainae honu. ²² Sio oaiinu anggur sanaute wani honue pani une-une unte wani monae tewa. Tea mo, mka anggur sanaute wani honue rei ereuna unte rei wakihai. Ereuna sai-sai anggur sanaute runa unte uare. Anggur sanaute wani honue mo, kahurao oaiinui tau une-une unte wani honue oi.”

Yesus iatuheteso sanrei na oanei ata maunaune wani honue mo, onehui runa maunaune wani monae mo, iake tewa.

Sio oamanaru Yesus oahata ipusu ranie hatae wani iaranahata tewa

²³ Tau ranie hatae wani iaranahata isa, Yesus waini ieu iniku sui nisi isa. Nisi reimo, sio orahui tau manei (nooi sani ana kanie). Yesus ne mampusua oeu ohuku manei rei nene huaya, na oai. ²⁴ Sio ona Farisiu onoo sanrei, oyo oasei tau Yesus oahata, “Masi anoo. Ano me mampusua mo, opusu Musa ne maunauna tewa. Wasoni ohuku manei tau ranie hatae wani iaranahata, nanie tahae?”

²⁵⁻²⁶ Iahata, “Omi onoo tau Anahatana ne anamanaya tewa, sapani na Daud inana poroti wani sio oruiki osi Anahatana. Poroti reimo, Anahatana hasae itapi sio mamkenu makapanau osi Anahatana ruao mani sahoro oaiki. Aikee Daud inanai. Inanai tau Abyatar iuna ia aihuhue tau sio mamkenu makapanau osi Anahatana. Daud runa sio wasoni okatai rei omakaneaso. Reiso inusui pani Anahatana ne

numa mainisie, oyo iai poroti rei. Isama sio wasoni okatai rei oi. Ne ia isa iakapuku tanui tewa. ²⁷ Reiso ranie hatae wani iaranahata mo, Anahatana iunai osi mansia, ihaye mansia tewa na opusu maunauna rerihoni ranie hatae wani iaranahata rei mani. ²⁸ Reiso Au, Tumata Reini, Anahatana Ihitiku, we kawasa uasau sae sahoro Anahatana itapita iunai tau ranie hatae wani iaranahata.”

3 ¹ Oyo Yesus ieu pani numa manoune honu, oyo isupu ia hanaie isa. Ia reimo, hanai atue erematai. ² Sio umau pani rei wasoni oaka-akaohu Yesus, nanie oamanarui. Nanie onoo ata kani isuisene ia rei tau ranie hatae wani iaranahata rei te tewa. ³ Oyo Yesus iasau osi ia kupue rei. Iahata, “Aeu mai na ooa kua tihue reini.” ⁴ Yesus iasei tau sio panesi rei. Iahata, “Nene iake tau ranie hatae wani iaranahata reini mo, iuna sae? Luna iake? Luna kahatene? Luna karihuru? Te ihunu? Te sae?”

Ne sio panesi rei oamaturuso mani. ⁵ Oyo iasumataso. Anoi eresaa. Anoi runaso tau sio unuo onata. Oyo iasau osi ia kupue rei iahata, “Asasona hanamu mai.”

Oyo iasasona hanai. Hanai iake nea. ⁶ Oyo sio ona Farisiu rei ohokaso arihoni sio Yahudiu no numa manoune rei, oyo oanamana runa Herodes ne mampusua, na nanie ohunu Yesus.

Sio panesi oahata Yesus mo, ia iake reiso opusui

⁷ Yesus runa ne mampusua oeso oarihoni sio hutue rei, oyo oeso pani waene. Ne sio Galileau panesi oeu opusu Yesus oi, runa sio on pani otoi Yudea, ⁸ sio on pani kota Yerusalem, sio on pani otoi Idumea, runa sio on ria Wae Jordan on ria hae, runa sio on nau nia Tirus runa nia Sidon. Sio pusiso ohokaso pani Yesus tau oatinu rerihoni iuna sae. ⁹ Reiso Yesus iaisosi ne mampusua onoo na arupae isa matane osiki. Oyo orurui hainekei. Ikaitau pene tutu sio mansia hutue wasoni sinasi rei oesei reiso iainisi arupae rei. ¹⁰ Isuisene kupua inaya panesi, reiso sio kupua pusiso oruru heu umau, na oeu haineke Yesus na oakahuui. ¹¹ Sakahatena ranoo Yesus, ranoo ata ia mo, ihokai arihoni Anahatana. Reiso oakapona oahata, “Ano sahoro Anahatana Anai!”

¹² Ne Yesus isoposo na pene osima runa ia, ata ia mo, ia seia.

Yesus ihiti ne sio maisosia hutusa rahana ua

¹³ Yesus isuisene sio kupa pusi, oyo inoai roe pupue, samatoro ianaha runa sio umau wasoni ruai ne maue na opusui. Sio rei ohokaso roe, ¹⁴ oyo ihiti sio hutusa rahana ua. Iahata, “Uhitimo na okataku sui supani na uaisosimo oounau runa Sou lake wani on roe Anahatana. ¹⁵ Mka Anahatana irui kawasa osimo na onei sakahatena.”

¹⁶ Sio hutusa rahana ua wasoni Yesus ihitiso rei mo, nanao:

Simon (Simon mo, Yesus ihete nanai tau Petrus),

¹⁷ Yakobus runa wanini Yohanes (uaso noa ama tau Zebedeus, Yesus ioiso tau Boanerges, nene manariti ‘sio sani tinai’),

¹⁸ Andreas,

Filipus,

Bartolomeus,

Matius,

Tomas,

Yakobus (amai tau Alfeus),

Tadeus,

Simon ia Zelot,

¹⁹ runa Yudas Iskariot, ia waini mka iaeheni Yesus na sio ohunui.

Sio matuhete Musa ne maunauna oamanaru Yesus

²⁰ Yesus inuniki on roe pupue, oyo inusu pani numa isa. Ne mansia hutue ohoka oamanouso honu rotu-tu Yesus runa ne mampusua oai mosa tewa. ²¹ Ne mansiau oatinu sanrei, oyo oeu osotai, tea mo, sio panesi oasau oahata, “Iarirunei nea.” Sio oasau sanrei tau iai tewa.

²² Sio matuhete Musa ne maunauna wasoni ohokaso on roe kota Yerusalem oasau oahata, “Beelzebul eresuniki!” (Beelzebul mo, ia aia sakahatene.) “Reiso la aia sakahatene rei irui kawasa osiki nainei sakahatena rei tea!”

²³ Oyo Yesus ioi sio hutue rei, samatoro iaunauso tau mamruni matuhetena. Iahata, “Sapani na sakahatene erenei sakahatene? ²⁴ Munata sio niane owena-wenaso, areimo niane rei huie nea. ²⁵ Munata ipane isa erewena-wenai, areimo ipane rei tihoniki nea. ²⁶ Reiso munata ia aia sakahatene inei ruai ne mansiau na owena-wenaso, mka ne kawasa mainae tewa nea.

²⁷ Noo sani ia isa nanie inusui pani ia mkonae isa ne numa na ikimanaka ne apia. Ne kahurae ikanihoo ia mkonae rei ee. Ikanihooi, samatoro inusui ikimanaka ne apia.” (Yesus ianamana rerihoni ruai sani ia waini ikanihoo ia mkonae rei. Ikanihooi, areimo sani inana ia aia sakahatene ne kawasa.)

²⁸ “Areini mo, anamana manisate. Anahatana isiru heu rosa sae mani runa isiru heu sio no anamana kahatena rerihoni Anahatana pusire. ²⁹ Ne munata sio oanamana kahatene rerihoni Anahatana Ne Inaha, Anahatana isiru heu no rosa rei tewa rotu-tu ria supani.”

³⁰ Iasau sanrei tau sio oasau oahata, “Sakahatene eresuniki.”

Yesus inai runa nea waniu

³¹ Yesus iatuhete pani numa anoe, inai runa nea waniu ohokaso. Ooso pani mui, oyo oaisosi ia isa ioi Yesus. ³² Sio mansia hutue wasoni orue ohori Yesus. Oyo ia rei iasau osiki iahata, “Masi anoo. Inamu runa mea waniu wasoni pani mui oninaya.”

³³ Iahata, “Ia seia sahoro inaku? Ia seia sahoro waniku tanui?” ³⁴ Oyo inoo ineka pusi sio wasoni orue ohoriki rei, oyo iahata, “Omi reini pusimo sahoro inaku runa wea waniu. ³⁵ Ia seia mani waini ipusu Anahatana ne maue, ia rei sahoro anoku runai sani waniku, hotaku, runa inaku.”

Mamruni matuhetene rerihoni ia mamrahue

4 ¹ Yesus waini iatuheteso honu mai Wae Galilea nusue. Sio mansia hutue ooo ohoriki. Sio hutue rei ouna patapariki reiso isaai pani arupae anoe oyo iruei pani rei. Arupae rei wani eremanu-manui. Oo sio hutue rei wasora waene nusue. ² Oyo Yesus iatuheteso. Iatuheteso ipake mamruni matuhetena. Iatuheteso sanrei, ³ “Oatinu. Ia mamrahue isa ieu iahurara manei kania. (Manei mo, nooi sani ana kanie.) ⁴ Iahurara manei kania rai, oo umau ramnahu arena tia. Oyo manua rahokaso raruture rotu-tu pusire. ⁵ Manei kania umau honu ramnahu hatu kania, tuamane mkane mani. Manei kania rai raruha san-sana mani, Tea mo, tuamane kamanite mani. ⁶ Oyo ranie katopu sanrei, manei tuhua rai ramnunuso rakaimeniso, oyo ramataso. Tea mo, namta rakaisunu hainau tewa tau tuamane rei kamanite mani. ⁷ Manei kania umau honu ramnahu mono unia. Oyo mono unia rai raruha rasapa manei tuhua rai, reiso rahua tewa. ⁸ Manei kania umau honu ramnahu tuama iake. Manei kania rai tuhua, oyo raruha iake, reiso rahua. Nene huaya rai, umau rasupu huaya hutu tonu, umau hutu nome, oo umau honu rasupu utuni.”

⁹ Oyo Yesus iasau, “Ia seia tinai ukuna areimo, iatinu ia-ia na ianei.”

¹⁰ Yesus waini ruai mani. Ia isa ikatai tewa nea. Oyo sio hutusa rahana ua rei runa sio umau honu oasei rerihihi mamruni matuhetene rei tanui. ¹¹ Reiso Yesus iasau osiso iahata, “Naone Anahatana iasau tewasi ata sapani na irime tuniai reini. Ne muie reini mo, au wani uatuhetemo na sapani runa Anahatana irime tuniai reini. Ne sio wasoni we mampusua tewa, uatuheteso tau mamruni matuhetena mani ¹² na

‘Onoo runa oatinu,
ne oanei tewa.

Munata oanei, mka anoo rauni rapusu Anahatana
oyo Anahatana isiru heu no rosau.”

¹³ Oyo Yesus iasau osiso iahata, “Munata oanei mamruni matuhetene rei tewa, sapani na oanei mamruni matuhetena umau honu? ¹⁴ Ia mamrahue mo, nooi sani ia waini iaunau rerihihi Anahatana ne anamanaya. ¹⁵ Manei kania waroni ramnahu arena tiaie mo, noore sani sio wasoni oatinu Anahatana ne anamanaya ne oaneire tewa. Ia aia sakahatene ihokai, oyo inana sae wani ia mamrahue rei irahui pani anoo rei. ¹⁶ Manei kania waroni ramnahu hatu kania mo, noore sani sio wasoni oatinu Anahatana ne anamanaya, oyo oararumare anoo iaka. ¹⁷ Ne anamanaya rai nene namta pani anoo tewa, reiso oapamese kua tewa. Osupu susa te sio umau ounaso sinsaraso noso oparisaa tau anamanaya rai, oyo oarihoniire rei sirinia. ¹⁸ Manei kania waroni ramnahu mono unia mo, noore sani sio waisoni oatinu anamanaya rai, ¹⁹ ne anoo rauponu runa tuniai reini. Nanie onina kepeni runa apia panesi mani, reiso Anahatana ne anamanaya rasapa pani anoo. Reiso sio mo, sani atuhu waroni rahua tewa. ²⁰ Manei kania waroni ramnahu tuama iake mo, noore sani sio wasoni oatinu Anahatana ne anamanaya rai, oyo oararumare. Sio reimo sani atuhu waroni rahua panesi. Umau rasupu hutu tonu, umau hutu nome, umau honu rasupu utuni.”

Mamruni matuhetene rerihihi sio wasoni oatinu Sou lake

²¹ Yesus iasei tau ne mampusua. Iahata, “Sani sio orori kamane, mka osoui tau parten? Te, oanutui poe nuhanoe? Areimo tewa tea! Ne kahurae oanutui roe kamane aie na eresita pusi numa anoe. ²² Sae wani oahuniki, mka erehokai mai manahane. ²³ Ia seia tinai ukuna mo, kahurae iatinu ia-ia. ²⁴ Oarinii sae waroni oatiniure rei. Sae wani oruiki osi sio umau, mka osupu sanrei oi. Mka osupu erenesi sae wani oruiki rei. ²⁵ Ia seia ianei mkane, mka ianei panesi. Ne ia seia ipenei ianei, mka anoi kanihue runa sae waroni ianeire nea rei.”

Mamruni matuhetene rerihihi manei kania raruhi

²⁶ Yesus iasau osi ne mampusua honu. Iahata, “Anahatana irime tuniai reini mo, ita ianei tewa nooi sapani. Areini mo, nooi sani ia mamrahue waini iahurara manei kania poe tuamane. (Manei, nooi sani ana kanie.) ²⁷ Taa mono pani ia mamrahue rei inekei, tau ranie ihanui. Ne taa inekei ihanui, oyo inoo manei kania rai raruhi. Raruhi rotu-tu mainaya. Ne ia mamrahue rei ianei tewa ata manei kania rai mo, raruhi sapani! ²⁸ Tuamane rei ruae saoro ereuna manei kania rai raruhi. Mataanoie tuhua, oyo noena, samatoro huaya. ²⁹ Sani huaya mtuaya nea, oyo ia mamrahue rei ikurere. Tea mo, nania nea.”

Mamruni matuhetene rerihihi Anahatana irime tuniai reini

³⁰ Yesus iasei tau ne mampusua honu. Iahata, “Anahatana irime tuniai reini mo, nooi sani sae? Au nanie uruni mamruni matuhetene isa osimo na oanei rerihihi Anahatana irime tuniai reini mo, sapani. ³¹ Irime tuniai reini mo, nooi sani kanapua kanie. Kanie reimo, kanie wani iki-kine nai osa. Areimo, sani mataanoie sio panesi

opusu Anahatana tewasi. ³² Sani munata kanapua kanie rei ereruhu, mka ereruhu mainae nai osa. Nene sanaya mainaya, rotu-tu manua rarihu ratasohoso rauna nene none rapusu sana nohua.”

³³ Yesus iaunau tau mamruni matuhetena panesi sanrei, areimo inoo pusu ia seia mani waini ianei mosa maunauna rai. ³⁴ Yesus iaunau mansia hutue tau mamruni matuhetena mani. Ne mampusua iae, iaunau tau mamruni matuhetena oi, ne isima runa nene manariti osiso.

Yesus iuna ihu mainae remene

³⁵ Taue isa, tau ranie manne, Yesus iasau osi ne mampusua. Iahata, “Mai, na isaa arupae na ieuta ria hae.”

³⁶ Yesus waini iru-ruei pani arupae anoe nea, oyo ne mampusua oeu oarihoni sio hutue nau waene nusue, samatoro osaa opusu Yesus pani arupae anoe. Nau rei iae, arupaeu tamena waromo oi. ³⁷ Potuina tewa oyo sira tau ihu onate reutenu. Kolau rahita-hita arupae rei, rotu-tu ranususo pani arupae anoe rotu-tu haineke taue tau tihu nea. ³⁸ Yesus waini inekei pani arupae rei nene muie. Inekei inaka unui roe kanakuru. Ne mampusua ohanui, oyo oasau oahata, “Upuku Matuhetene, ano mo, anomu iake? Mka imokota nea reini?”

³⁹ Yesus ihanui, oyo ihesa tau ihute rei. Iasau osi waene rei. Iahata, “Apurumenea! Amaturuai!” Oyo ihute rei remene. Waene rei eremanu.

⁴⁰ Oyo Yesus iasau osi ne mampusua, “Omi okaitau tahae? Oparisaa tau Au tewa tahae?”

⁴¹ Reiso okaitau. Oasei tau umau, “Ia reini mo, ia seia? Ihute runa kolau mani iae, rapusu ne mau.”

Yesus ne kawasa inei sakahatena

5 Yesus runa ne mampusua ohokaso ria Wae Galilea ria hae, ria otoa Gerasa. ² Hoka ria oyo, osipuso oarihoni no arupae rei. Oyo, sira tau ia isa waini sakahatene eresuniki ihokai nau Yesus. Ihokai arihoni hatu nohua. Pani hatu nohua rai, sio oaunutu sio matana. ³ Ia rei iruei pani hatu nohua rai. Sio okanihoo kuai tewa nea oi. Tau rante iae, okanihoo kuai tewa oi. ⁴ Naone okanihoo hanai aini, ne iuna roha rante rei arihoni hanai aini. Ia rei iamkona, reiso oapamese kuai tewa. ⁵ Ieu onone ranie pani hatu nohua rai sirinia. Roe pupua iaka-kapona iasa-sanoata. Ihita ruai tau hatu rotu-tu ne apata.

⁶ Taa inoo Yesus on nau hainau, oyo irumai mai tanui, irike tune iakapuni aini, nanie iamuirai. ⁷ Irike tune oyo, ianamana runa nioi makae. Iahata, “Yesus, Anahatana Waini Ia Aihuhue Anai, ano nanie amunaku? Uainisi tau Anahatana nanai, pene auna sinsaraku.” ⁸ Iasau sanrei, tau Yesus iasau osiki nea. Iahata, “E! Ano sakahatene. Ahoka arihoni ia reino.”

⁹ Oyo Yesus iasei tanui, “Nanamu seia?”

Iahata, “Au, nanaku mo, ‘Panesi’. Tea mo, ami mo, ami panesi.”

¹⁰ Oyo iainisi arihoni Yesus. Iahata, “Pene aneima arihoni tihue reini.”

¹¹ Ne hahu panesi waruro ranina muaia roe pupue isa hainekeso. ¹² Sakahatena rai oainisi arihoni Yesus. Oahata, “Aisosima na aeuma anusuma pani hahu raipani.”

¹³ Oyo iaisosiso pusu no anamanae rei. Reiso, sakahatena rai raeu rarihoni ia hanaie rei, oyo ranususo pani hahu panesi rai. Hahu raimo kani nihi ua. Ranusure, oyo hahu rai rarumaso ramusu ekote hanae rei, oyo ramnahuso on roe tatepie. Ranususo poe waene, oyo ramokoso.

¹⁴ Reiso, sio mamsaka hahu rai orumaso. Orumaso, nanie osima osi sio ria niane runa sio noi nisiu. Osima, oyo pusiso ohoka, nanie onoo. ¹⁵ Hoka nau oyo, onoo ia hanaie waini naone sakahatena rasuniki rei. Onooi waipe iruei, iausahu

ne apia, imukei tewa nea. Taa sanrei oyo, pusiso okaitau. ¹⁶ Oyo sio wasoni onoo pusire sinasi rei, oruni ria nau rerihoni Yesus inei sakahatena arihoni ia hanaie rei. Oruni runa sapani na iaisosi sakahatena rai ranusu tau hahu rai. ¹⁷ Oyo pusiso oainisi tau Yesus. Oahata, “Upu. Aeu arihoni ma otoa reini nea.”

¹⁸ Reiso, Yesus isaa no arupae wani sinasi rei. Oyo ia waini naone sakahatena rasuniki rei iainisi na ipusui oi. ¹⁹ Ne Yesus iamanaku tewa. Iahata, “Nunia na asima osi me niane hahae rerihoni Upumu iuna sae osia nea rei. Asima runa sapani na anoi runaya.”

²⁰ Reiso, ieu iarihoniki. Oyo, ia rei ieu iruni sui Niana Hutusa rerihoni Yesus iuna sae osiki nea rei. Sio pusiso oatinui, osira.

Yesus ne kawasa ihanu ia matane

²¹ Yesus inuniki on ria Gerasa isaa arupae nanie ieu nau waene on nau hae. Hoka nau oyo, sio panesi oamanouso ohoi Yesus nau waene rei nusue. ²² Ia onate isa inoo Yesus. Oyo sira tau ihoka poe, irike tune iakapuni Yesus aini. Ia onate rei mo, nanai Yairus. Ia mo, ia onate tau sio Yahudiu no numa manoune. ²³ Oyo iainisi tau Yesus iahata, “Upu. Anaku pina waipo ikupui mtinte. Masi apusuku mai, na aeu poe akahuui tau hanamu, na ikarihuru iamahai ee. Pene imatai ee.”

²⁴ Reiso, ieu ikata Yairus.

Sio panesi rei opusu Yesus oi. Sio rei oesei on ria, on nau. ²⁵ Ia pina isa waini ieu nasi musum hutusa rahana ua nea waimo ikata sio panesi rei oi. ²⁶ Inun nana noi sio mamsuisenea nea, rotu-tu ne kepeni runa ne apia pusire nea. Ne ne kupue rei iake tewa sirinia. Kupue rei mtinte rekapena honu. ²⁷ Latinu sio oruni ria nau rerihoni Yesus. Reiso ieu ipusuo tau muie haineke Yesus, oyo isii ne papite. ²⁸ Iasau pani anoi iahata, “Hete sae usii ne papite mani o, we kupue reini iake rei sirinia.”

²⁹ Reiso isii ne papite, oyo nasi rerihoni rei sirinia. Iahana ata ne kupue rei iake nea. ³⁰ Yesus iae iahana noo sani ne mkonae erekaisunu mkane. Reiso inoo sio panesi rei, oyo iasei iahata, “Ia seia isii we papite rei?”

³¹ Ne mampusua oasau oahata, “Upu. Anoo sio hutue reini wasoni oesea on ria on nau reini tewa? Reiso, nanie ase iata ia seia isii me papite rei nanie tetae?”

³² Ne Yesus inoo neka pusiso, na nanie isupu ia seia waini isii ne papite sinasi rei. ³³ Oyo ia pina waini isii Yesus ne papite sinasi rei ianei ata ne kupue rei iake nea. Reiso ikana-kananunui. Ikaitau isima runa ruai. Oyo irike tune pani Yesus uai anoe, iakapuni aini, oyo isima runa pusire. ³⁴ Reiso, Yesus iasau osiki iahata, “Anaku. Aparisaa tanuku, reiso me kupue rei iake rei sirinia. Aeu noi, akarihuru amahai. Mka asupu kupue rei tewa nea.”

³⁵ Reiso waini ianamana osiki asi, sira tau sio umau ohokaso on pani Yairus, ia onate wani sinasi rei, ne numa. Hoka poe oyo, oasau oahata, “Upu. Anamu pina watipusi nahai nea. Pene akarema me matuhetene reino nea.”

³⁶ Ne Yesus iatinu tau sio rei tewa. Iasau osi ia onate rei, iahata, “Pene akaitau. Aparisaa mani.”

³⁷ Oyo Yesus isopo sio panesi rei na pene opusui. Hasae Petrus, Yakobus runa wanini Yohanes mani, sahoro opusui.

³⁸ Hokaso poe ia onate rei ne numa oyo, onoo sio panesi ouna purie mainae nai osa. Wasoni orani, ohiti, oasanoata. ³⁹ Oyo Yesus inusui pani numa rei, iasei tanuso iahata, “Omi ouna purie, orani oasanoata, nanie tetae? Ia iki pina reini mo, imatai tewa. Ne waini inekei mani!”

⁴⁰ Iasau sanrei oyo, sio panesi rei oaumaniki. Reiso iaisosi sio pusiso ohokaso. Oyo ikata ia iki pina rei ne mansia mainaya runa sio mampusua tonu rei mani pani ia ikine rei ne kamar. ⁴¹ Oyo iakahuu ia ikine rei hanai, iasau osiki iahata, “Talita kum.” (Nene manariti, ‘Anaku pina, ahanu.’)

⁴²Oyo ia iki pina rei ihanui. (Ia iki pina rei ne musum hutusa rahana ua nea.) Ihanui oyo, ieu. Sio pusiso wasoni onoo rei, osira hunu ruao nai osa! ⁴³Oyo Yesus isopo sio pusiso. Iahata, “Pene oeu oruni osi ia seia mani. Ne opana ia ikine pina reini.”

Yesus ne niane hahae openeso tanui

6 Yesus ihanu ia iki pina rei pusi oyo, ieu arihoni otoa rei. Inuniki poe ruai ne niane ikata ne mampusua. ²Hoka poe oyo, iatuhete tau ranie hatae wani iaranahata pani sio Yahudiu no numa manoune. Sio panesi wasoni pani rei. Iatuheteso, oyo sio wasoni oatinu rei, osira. Oasei, “Ia reini mo, isupu ne maunauna rai on supa? Ianei rai pusire on supa? Sapani na imaha iuna sima-simana rai?” ³Ia reini mo, ia mamnana numa. Maria anai. Yakobus, Yoses, Yudas, runa Simon kakai. Nea hotau iae orue mai rei oi.” Reiso sio rei openeso tanui. Openeso oatinu tau ia nea.

⁴Iahata, “Ia mamsima runa Anahatana ne maunauna, sio oamuirai sui supani. Hasae ia ruai ne niane, ne ipane taue, nea enau sahoro oamuirai tewa.” ⁵Noi niane rei, Yesus iuna sima-simane isa tewa oi. Hasae isuisene sio kupua mkana. Iahusieso mani oyo iake rei sirinia. ⁶Reiso isira ata sia oparisaa tanui tewa. Oyo ieu. Ieu iatuhete neka niana-niana.

Yesus iaisosi sio hutusa rahana ua oaunau

⁷Yesus ianaha runa ne mampusua hutusa rahana ua rei. Pusiso oamanouso oyo, iaisosiso oeu sana ua-ua. Iruai kawasa osiso na onei sakahatena. ⁸Iaisosiso iahata, “Pene orori sae mani. Pene orori muaine te, tasi te, kepeni te. Pene oi. Hasae orori toka-toka mani. ⁹Oausahu sandaliu. Ne pene orori papita ua. Orori hasae osa mani. ¹⁰Sani munata onusu pani numa isa, orue tau numa rei rotu-tu oeu oarihoni niane rei. ¹¹Ne munata ohoka noi niane isa, oyo oapusaamo tewa, areimo oeu oarihoni niane rei. Ne munata openeso oatinu tanumo, areimo oeu oarihoniso. Oroho heu tapuna arihoni aimo atua na sio oanei ata Anahatana inooso osana. Sio osana tau sio oatinu tau ne maunaune tewa.”

¹²Reiso, Yesus ne mampusua hutusa rahana ua rei, oeu oaunau. Oahata, “Ita kahuraa iarihoni re rosau.” ¹³Oeu onei sakahatena panesi runa ososa sio kupua tau wekatisie na osuisenese.

Yohanes ia mamsohue imatai

^{14–29}Tau Yesus sio oeu osuisene rei, Herodes sahoro iuna aia. Inana wanini Filipus sahai nea waini nanai Herodias. Aikee Filipus mo, imata tewasi. Reiso Yohanes mamsohue iaunau sui osa. Iahata, “Anahatana itapia tewa na anana wanimu sahai.”

Reiso, Herodes iaisosi sio umau na osota Yohanes na onusui pani pui anoe. Herodias iakapuku tau Yohanes reiso nanie ihunui. Ne Herodes inetei na pene ihunui. Iaisosi sio umau osaka Yohanes ia-ia na pene sio umau oakaremai. Tea mo, Herodes ikaitau Yohanes. Ianei ata Yohanes mo, anoi manisate. Ia manisate onate. Sani Yohanes iaunau mo, Herodes ne suka iatinu. Masike anoi eresama-samai tau Yohanes ne maunauna rai iae, ne suka iatinu tanui sirinia.

Ne Herodias isupu arena sirinia na ihunu Yohanes. Herodes ne musum manisata oyo, iuna karisaa. Ianaha runa sio onata arihoni kupania, sio soratatua, runa sio onata pusiso sui otoa Galilea. Tau karisaa rei, Herodias anai pina imarae. Herodes runa sio onata wasoni ianaha runaso rei pusiso no suka oasumatai. Reiso Herodes iasau osi ia pina hehuke rei. Iahata, “Nanie ainisi sae arihoniku na uruiki osia? Areimo asau mai!”

Oyo Herodes isopa sanrei, “Sae mani wani ainisiki arihoniku rei, mka uruiki osia. Masike ainisi we tuamane samatihue iae, mka uruiki osia sirinia.”

Oyo ia pina hehuke rei ihokai arihoni sio panesi rei na nanie iasei tau inai. Iahata, “Ina. Nene iake uainisi sae?”

Iahata, “Ainisi Yohanes mamsohue unui.”

²⁵ Mata huni tewa oi, oyo inuniki mai Herodes honu. Oyo iahata, “Nanie uainisi Yohanes ia mamsohue unui. Aroriki san-sana mai. Aunutui roe loyan anoe!”

²⁶ Herodes iatinu ne mainisire rei oyo, anoi mtinte. Nanie ipenei, ne isopa nea. Sio wasoni opusu karisaa rei iae oatinui nea oi. ²⁷ Reiso iaisosi ia mamhunue isa inana Yohanes mamsohue unui. Reiso ia mamhunue rei, ieu poe pui, oyo iroto roha Yohanes tionai. Iroto roha tionai oyo irori unuke rei tau loyan, oyo iruiki osi ia pina hehuke rei. Oyo ia pina hehuke rei irui unuke rei osi inai honu.

Yohanes ne mampusua oatinu sanrei oyo, oeu onana Yohanes hatai, samatoro oanutui pani hatu nohue.

Oyo Herodes iatinu rerihoni Yesus ne atata. Tea mo, sio panesi oanei Yesus nanai sui supani mani. Sio umau oasau oahata, “Yohanes ia mamsohue mo, waini iamahaiki honu! Reiso ne kawasa iuna sima-simana rai.”

Ne sio umau honu oasau sanrei, “Ia mo, Elia.” Sio umau honu oasau, “Ia mo, ia mamsima runa Anahatana ne maunauna isa sani sio mamsimana naone.”

Herodes iatinu sanrei oyo, iahata, “Manisate, ia reini mo, Yohanes ia mamsohue, waini naone uaisosi sio oroto roha unui rei tea! Waini iamahaiki honu.”

Yesus ne kawasa ipana sio panesi

³⁰ Yesus ne mampusua oeu oau nau oyo, ne maisosia rei onuniso. Hoka mai, oyo oamanouso. Oamanouso na osima osi Yesus rerihoni sio no atata pusire runa sio oau nau sapani. ³¹ Ne sio panesi onusu ohoka mai Yesus, rotu-tu ia runa ne mampusua oai mosa tewa. Reiso Yesus iasau osiso. Iahata, “Mai, na ieu ta pani otoa huie isa na oaranahamo mkane.”

³² Reiso osaa arupae, oeuo pani otoa huie. ³³ Ne sio oeuo rei, sio panesi onoo. Oationaso. Reiso, sio panesi arihoni niana pusire pani otoa reipa oruma oanaoneso pusu kaimenne, nanie osupu Yesus runa ne mampusua.

³⁴ Yesus sio ohoka on nau hae nanie osipuso arihoni no arupae rei, inoo sio hutue rei. Anoi runaso. Tea mo, sio sani rompau no ia mamsakae tewa. Reiso iatuhete panesi osiso.

³⁵ Tau ranie manne nea, sio mampusua oasau osiki oahata, “Upu. Haineke pumono nea. Otoa reini mo, huie. ³⁶ Nene iake mo, aisosi sio hutue rei oeuo na ohane muaine sui niana mai otoa reini.”

³⁷ Ne iahata, “Omi sahoro opanaso.”

Oahata, “Ira oe! Mka ahane porotiu osi sio panesi rei sapani? Arai ranana kepeni panesi.”

³⁸ Iahata, “Oeuo onoo. Porotiu hua ina waromo?”

Oeu onoo, oyo osima oahata, “Porotiu hua nima waroni runa ika use ua mani.”

³⁹ Oyo Yesus iaisosi sio pusiso orue tumun-tumun poe monota hutua. ⁴⁰ Sio pusiso orue tumun-tumun. Sio utuni oamanouso tau osa. Sio hutu nima oamanouso tau osa. ⁴¹ Oyo Yesus inana porotiu hua nima rai runa ikaya use ua rai. Ikatare oyo iarinaa na roe nante. Iahata, “Amaku Anahatana ano mo, ano iake. Arui muaina raini osima.”

Iasau sanrei oyo, ikuparehi porotiu rai mkana-mkana tau hanai, oyo iruire osi ne mampusua, inina na osamare osi sio panesi rei. Oyo isama ikaya use ua rai osi pusiso oi. ⁴² Oyo sio pusiso oaiso rotu-tu tia pokona nea. ⁴³ Oaiso suka, oyo sio mampusua oamanou porotiu runa ikaya nesia rai. Nesia rai, oamanoure tau

pakuna hutusa rahana ua rotu-tu taua. ⁴⁴ Tau sio hutue rei mo, sio hanaia, sio mainaya nihi nima oai muaina rai runa sio pinau runa sio ikina oi.

Yesus ne kawasa ieu i roe waene hahae

⁴⁵ Yesus ipana sio hutue rei pusi, mata hun oyo, mata hun oyo, aisosi ne mampusua oeuso oanaone tau arupae pani nia Betsaida, pani hae. O, ia ruai aisosi sio hutue rei onunisio. ⁴⁶ Pusiso onunisio samatoro Yesus ieu roe pupue, nanie ianamana runa Anahatana.

⁴⁷ Nene pumono pani sanrei oyo, ne mampusua runa no arupae rei wasonau waenaeha tihue nea. Ne Yesus ruai waira kaimenne asi. ⁴⁸ Inoo ata omankaeso, osai kua no arupae tewa nea tau ihute on pani uae. Oyo nene kinoke sanrei, ieu i pani tanuso. Ieu tau aini roe nakane hahae. Hoka pani oyo, ieu i sani nanie inikusio. ⁴⁹ Onooi ieu i ipusu waene hahae sio ata sakahatene. Reiso oasanoata. ⁵⁰ Tea mo, onooi, oyo okaitau hunu ruao. Oyo sira tau iasau iahata, “Apamese anomo. Au ruaku reini tea! Pene okaitau.”

⁵¹ Oyo isaa pani tanuso, pani arupae rei. Isaa oyo, ihute rei remene. Sio mampusua osira hunu ruao. ⁵² Osira hunu ruao, tea mo, potusi Yesus inana porotiu hua nima iunare panesi. Oanei tewasi ata sima-simane rei nene manariti sapani. Oanei sae isa tewasi.

⁵³ Reiso ohokaso pani hae, oyo opesi hatu aie pani tihue wani nanae Genesaret. ⁵⁴ Hoka pani oyo, osipuso arihoni arupae rei. Osipu poe, oyo sio pusiso pani rei oationa Yesus. ⁵⁵ Reiso ohori otoi rei, orori sio kupua mai Yesus tau kinoa. Munata oatinu ata Yesus wai pani otoi isa, orori sio kupua pani otoi rei. ⁵⁶ Sui supani mani Yesus ihokai, pani niana, noi nisiu, orori sio kupua pani naniai. Sio oamanousio sui osa. Oyo oainisi tanui. Oahata, “Upu. Pene asopo sio kupua osii ne papite aie. Masike hasae ne papite aie iae, pene asoposo.”

Yesus iatuhete rerihoni sae wani ereunata iapaputi Anahatana

7 ¹ Sio onata arihoni akama Yahudi runa sio matuhete Musa ne maunauna mato ohokaso oarihoni kota Yerusalem, oamanousio mai Yesus. ² Sio rei onoo Yesus ne mampusua umau oaiso osohu hanao tewa. Oposu noa upu no monne tewa.

³ Sio onata rei runa sio Yahudiu pusiso opusu noa upu no monna ia-ia. No monna waroni rakai-kaisunu osiso. Reiso osohu hanao samatoro oaiso. ⁴ Sae wani ohanei noi pasar, osohui tewasi mo, oaiki tewa. Orime kuru noa momou noa upu no monna panesi waroni rakai-kaisunu osiso. Monna sani osohu no koinanaya, piruna, runa parteniu.

⁵ Reiso sio onata runa sio matuhete Musa ne maunauna oasei tau Yesus oahata, “Ano me mampusua opusu rea upu no monna waroni rakai-kaisunu osita tewa, tahae? Sapani na oaiso osohu hanao opusu monne tewa?”

⁶ Iahata, “Omi oasei oreaku. Masuae Yesaya isima rerihoni mka omi mo hali no oamrae tewasi mo, sapani. Isima pannuhu. Iahata Anahatana iasau sanrei, ‘Sio reini mo, oamuiraku, ne oamuiraku hasae roe hohao mani, ne sio anoo hainau arihoni au.’”

⁷ Sio orike tune oainaa runa au tau sae isa tewa tau sio oatuheteso tau mansiau no maunauna sani au we maunauna.

Aikee au we maunauna mo, sanrei tewa.’

⁸ Anahatana ne maunauna mo, omi oarihoni. Ne mansiau no monna mo, omi orime kurure.

⁹ Omi oanei ia-ia openemo tau Anahatana ne maunauna. Opesi ne maunauna rai na opusu ruamo mo monna. ¹⁰ Musa iaunau sanrei nea, ‘Amuira inamu runa

amamu. Ia seia mani ianamana kahatene rerihoi inai runa amai, kahurae oaresiki, oyo ohunui.’

¹¹ Ne omi oounau sanrei. Munata ia isa iasau tau inai te amai mo, iahata, ‘Sae mani kahurae uruiki osimo, uruiki osi Anahatana nea.’ ¹² Omi oasau ata iake, ia rei iakahai inai runa amai tewa. ¹³ Reiso tau monne sanrei, omi oruiki osiso, ouni Anahatana ne maunauna. Mo atata panesi sanrei.”

¹⁴ Oyo Yesus ianaha runa sio panesi honu samatoro iasau iahata, “Oatinu na oanei! ¹⁵ Sae isa wapani manahane, kani erenusui mai anori ereuna ita ikitatai tau Anahatana matai hunua tewa. Ne sae mani erehokai arihoi tumata, areimo ereunai ikitatai tau Anahatana matai hunua. ¹⁶ Reiso munata ano tinamu ukuna mo, saka atinu.”

¹⁷ Yesus ieu iarihoi sio panesi rei, oyo inusui pani numa isa, samatoro ne mampusua oasei. Oahata, “Upu. Mamruni matuhetene rei nene manariti saei?”

¹⁸ Iahata, “Oanei tewasi? Oanei tewa ata sae mani wani ita iaiki ereunata iapaputi tewa? ¹⁹ Sae wani ita iaiki erenusu pani tiari mani, oyo ieu heui honu.”

Pusu anamanaya rai Yesus iasau ata ita iai muai sae mani iae iake.

²⁰ Oyo Yesus iasau honu iahata, “Sae wani erehoka arihoi anori, areimo ereunata iapaputi. ²¹ On pani anori rahoka sae mani wani kahatena waroni rauna ita iamanea, ikimanaka, ihunu, ²² isahu-sahu re pina-hanai, nanie inana sio umau no apia, iakahate, iakarota, iamuiru tewa, ianana, iruni mansia, ihati ruari, iarinii tewa. ²³ Re huna-hunau rai rahoka arihoi anori, oyo raunata iapaputi Anahatana.”

Ia pina iparisaa mainae

²⁴ Oyo Yesus ieu iarihoi otoi rei nanie ieu poe, haineke kota wani nanae Tirus. Hoka poe oyo, inusui iaahuniki pani numa isa. Ipeni tau sio oanei ata waini ihokai nea. Ne masike sanrei iae, oatinu sirinia ata waipo ihokai. ²⁵ Mata hun tewa oyo, ia pina isa iatinu ata waini ihokai nea. Reiso ihokai mai tanui. Hoka mai oyo, iamnohoi mai uai anoe. Ia pina rei anai pina isa, sakahatene eresuniki. ²⁶ Ia mo, ia Yahudi tewa. Ia rakane. Ianamana sou Yunani, iamrae poe otoi isa nanae Fenisia poe Siria. Reiso iamnohoi mai uai anoe iahata, “Upu. Uainisi tanua na anei sakahatene arihoi anaku pina.”

²⁷ Oyo Yesus ianamana rerihoi sio Yahudi sani sio ikina iahata, “Kahurae sio opana sio ikina naone. Sani onana sio ikina no muaine, oyo opesiki osi asu, areimo iake tewa.”

²⁸ Iahata, “Titue upu. Ne asu poe tuamane raai muaina nesia waroni sio ikina ouna ramnahuso.”

²⁹ Iahata, “Ano asana iake, reiso masi anunia. Sakahatene erehokai arihoi anamu pina nea.”

³⁰ Oyo inuniki. Ihokai pani numa, oyo isupu anai rei inekei roe naniai. Sakahatene rei erehokai arihoniki nea.

Yesus isuisene ia ririene mouke

³¹ Yesus ieu iarihoi otoi wani nanae Tirus, oyo ieu poe nia Sidon, oyo ieu ria otoi Niana Hutusa, samatoro ihokai mai Wae Galilea. ³² Hoka mai oyo, sio umau orori ia isa waini iaririe runa iakamoui osiki. Sio oainisi oahata, “Upu. Akahuui tau hanamu.”

³³ Yesus inana ia rei arihoi sio hutue wasoni pani rei, oyo isipa hanai nakata pani tinai ukuna. Oyo ihuto isii meini. ³⁴ Isiiki, samatoro iarinaa roe nante, inuse saena, oyo iasau osiki tau ia ne sou, “Efata.” Nene manariti, ‘Heka nea.’

³⁵ Iasau sanrei, oyo tinai ukuna raheka. Iatinu iake nea. Meini manne nea. Ianamana iake nea. ³⁶ Oyo Yesus isopo na pene oeu oruni osi ia seia mani. Yesus

isoposo sui osa. Ne sio oeu oruni suru ria, suru nau osi sio panesi. ³⁷ Oyo sio pusiso oatinu, osira nai osa. Oasau oahata, “Ira oe. luna pusire iake. luna sio wasoni oaririeso oatinu, runa sio wasoni oakumouso oanamana.”

Yesus ipana sio nihu ate

8 ¹ Yesus isuisene ia waini iakumoui runa iaririe pusi, oyo tau rei oi, sio hutue oamanouso honu. Sio hutue rei no muaine tewa, reiso Yesus ioi ne mampusua, oyo iasau, ² “Anoku runa sio hutue reini. Okatata onona ua nea rotu-tu no muaine tewa nea. ³ Sani uaisosiso onuniso on oaiso tewasi, mka omankaeso sui arena tinai tihua. Sio umau mo, orueso hainau.”

⁴ Sio mampusua oasei tau Yesus oahata, “Mai otoa huie reini mo, mka asupu muaine erelai osi pusiso on supa?”

⁵ Iahata, “Omi mo porotiu hua ina warumo?”

Oahata, “Hua itu.”

⁶ Reiso iaisosi sio hutue rei oru-rueso poe tuamane, samatoro inana porotiu hua itu rai, iasau osi Anahatana iahata, “Ano mo, ano iake. Arui porotiu raini osima.” Oyo ikuparehi porotiu rai mkana-mkana tau hanai samatoro iruire osi ne mampusua rei, oyo osama-samare osi sio hutue rei pusiso. ⁷ Sio no ika use ikina mkana oi. Yesus iasau osi Anahatana iahata, “Ano mo, ano iake. Arui ikaya rai osima oi.” Oyo iaisosi ne mampusua rei osama-samare oi. ⁸ Oaiso rotu-tu tia pokona nea, oyo sio mampusua oamanou muaina nesia tau paku onata itu rotu-tu taua. ⁹ Tau sio panesi rei mo, sio hanai mainaya nihu ate runa sio pinau runa sio ikina oi. Oaiso pusi, oyo Yesus iaisosiso onuniso. ¹⁰ Iaisosiso onuniso, oyo isaa no arupae runa ne mampusua. Osai rotu-tu ohokaso nau otoa wani nanae Dalmanuta.

Sio mampusua oanei tewasi ata ia seia sahora irui kawasa osi Yesus na iuna sima-simana

¹¹ Yesus sio ohokaso nau otoa wani nanae Dalmanuta, oyo sio onata arihoni akama Yahudi ohokaso mai Yesus nanie otuntana runai. Nanie oreai, reiso oainisi na iuna kakinata na onoo ata isupu ne kawasa arihoni Anahatana, na sio oanei ata kani ihokai on roe Anahatana te tewa. ¹² Yesus inesa nahai naue pani anoi, oyo iasei iahata, “Omi napisi reini mo, oainisi sima-simane na oanei ata kani au mo, uhokaku on roe Anahatana, nanie tahae? Upeneku una sima-simane sanrei osimo.”

¹³ Oyo isaa pani arupae anoe honu, oyo isai on nau hae iarihoni sio rei.

¹⁴ Ne Yesus ne mampusua anoo kanihua orori poroti tewa, hasae poroti hua osa wapani arupae anoe mani. ¹⁵ Iaisosiso sanrei, “Oatinu ia-ia. Ainati na sio onata arihoni akama Yahudi runa Herodes no mnehue.” Mnehue mo, ereuna poroti eresaa.

¹⁶ Reiso oasei tau umau oahata, “Iasau sanrei, nanie tahae?”

Oyo oapamata sou ata iasau sanrei tau sio anoo kanihua orori poroti. ¹⁷ Yesus ianei ata oasau sanrei reiso iasei iahata, “Oasau na re poroti tewa, nanie tahae? Oanei tewasi? Anomo makaya reiso oanei tewasi? ¹⁸ Omi mo, aikee matamo usena, ne onoo tewa? Omi mo, aikee tinamo ukuna, ne oatinu tewa? Anomo rapeka runa sae isa tewa? ¹⁹ Naone ukuparehi porotiu hua nima mkana-mkana osi sio nihu nima, oyo oamanou nesia tau pakuna ina rotu-tu taua?”

Oahata, “Pakuna hutusa rahana ua taua.”

²⁰ “Ia tau muie honu ukuparehi porotiu hua itu mkana-mkana osi sio nihu ate, oyo oamanou nesia tau pakuna ina rotu-tu taua?”

Oahata, “Pakuna itu.”

²¹ Iasei honu iahata, “Ne omi oanei tewasi ia seia iauwatuku?”

Yesus isuisene ia mata putie

²² Yesus runa ne mampusua oeuo poe nia Betsaida. Hoka poe oyo, sio umau oautunu ia mata putie isa osi Yesus. Oahata, “Upu. Ahusie na ia iake.”

²³ Oyo Yesus irime hanai, ihokai arihoni niane rei. Oyo Yesus ihuto matai usena, oyo iahusiei. Iahusiei, oyo iasei tanui iahata, “Ano anoo sae isa nea?”

²⁴ Inoo roe uae, iahata, “Unoo sio umau sani ai tinaia, ne sio wasoni oeu suru ria suru nau.”

²⁵ Ita iahusie matai usena tau hanai honu. Oyo ia mata putie rei inoo iake. Matai raputiso tewa nea. Inoo relalopo tewa nea. ²⁶ Oyo Yesus iaisosiki inuniki. Ne iasau osiki iahata, “Pene anuni noi niane rei nea.”

Petrus iamanaku ata Yesus mo, waini ia Anahatana iratiki iapuheu mansia

²⁷ Yesus runa ne mampusua oeu ohori otoi Kaisarea Filipi. Wasoni arena tinai tihue, oyo Yesus iasei tanuso iahata, “Sio oasau ata au reini mo, au seia?”

²⁸ Oahata, “Upu. Sio umau oasau ata ano mo Yohanes, ia mamsohue. Sio umau honu oasau ata ano mo, Elia. Samatoro sio tamena umau honu oasau ata ano mo, ano mamsima runa Anahatana ne anamanaya isa.”

²⁹ Iasei honu, “Ne pusu omi ruamo oasau mo, au reini mo, au seia?”

Oyo Petrus on poe iasau iahata, “Ano sahoru Anahatana Iratia Na Apuheuma!”

³⁰ Oyo Yesus isopoi iahata, “Pene osima osi ia seia mani. Pene osima rerihoni au ata, au mo, au seia.”

Yesus iasau runa mka pani muie imatai mo sapani

³¹ Yesus iatuhete ne mampusua. Iahata, “Kahuræ Au, Tumata Reini Mo, Anahatana Ihitiku sinsaraku panesi. Mka sio onata tau sio mamkenu makapanau osi Anahatana, sio matuhete Musa ne maunauna, runa sio ona Yahudi nesia rei openeso tanuku. Mka ohunuku, oyo onona ua, oyo uamahaiku honu.”

³² Iasau sanrei na oanei ia-ia ata waini iasau sapani. Reiso Petrus inesa Yesus. Iakapuku tanui, reiso iautunui ruai, oyo iasau sanrei, “Upu. Pene asau sanrei.”

³³ Ne Yesus iuniki, oyo inoo sio mampusua. Iakapuku tau Petrus, reiso iasau iahata, “Masi aeu arihoniku, ano aia sakahatene. Ano asau sanrei, ano arinii pusu tumata, ano arinii pusu Anahatana tewa.”

Ioi Petrus tau ia aia sakahatene tau ia aia sakahatene ipenei tau Yesus ipusu Anahatana ne maue.

³⁴ Oyo Yesus ianaha runa ne mampusua runa sio panesi wasoni pani rei. Hoka mai tanui oyo iasau osiso iahata, “Ia waini nanie ikata au, kahuræ anoi kanihue runa ruai. Kahuræ pene ipusu ruai ne maue. Oyo ihana ne hini wani reniene.

Kahuræ irui ruai na sinsarai imatai noo sani ihana hini rei. Oyo kahuræ ipusu au. ³⁵ Munata ipenei irui ruai sinsarai imatai, mka tau muie imatai sirinia, ne iruei hainau arihoni Anahatana. Ne munata ia isa irui ruai na iaunauso tau Sou lake rerihoni Anahatana, mka iamahaiki haineke Anahatana rotu-tu ria supani. ³⁶ Masike ia isa isupu arataeu pusire mai tuniai reini iae, ne mka imatai iruei hainau arihoni Anahatana. Arataeu rai tau sae? ³⁷ Masike isenu ne arataeu pusire iae, mka iruei haineke Anahatana tewa.

³⁸ Tau napisi reini mo, wani kahalatene runa oarihoni Anahatana na oainaa runa sio tamena, munata ia isa iaumaa isima ata iparisaa tau au runa we maunauna, Au, Tumata Reini Anahatana Ihitiku, mka uaumaa usima ata uationa ia rei oi. Mka uhokaku, oyo sio onooku. Onooku, ita-itaku runa we kawasa arihoni Anahatana. Uhokaku runa sio maisosia on roe noiyaha wasoni sio manisate onate. Mka uhokaku sanrei, upeneku usima ata uationa ia rei.

9 ¹Uasau osimo, sio umau wasoni okataku mai rei, mka omataso tewasi na onoo Anahatana irime tuniai reini runa ne kawasa.”

Yesus imuineni nitai

²Nene nome rei sanrei oyo, Yesus ieu ikata Petrus, Yakobus, runa Yohanes roe tinetae na ateso ruao. Hoka roe oyo, noi mata kahutua, sira tau Yesus imuineni nitai. ³Ne apia ita-itana, puti tunna. Ia mapatoie isa mai tuniai reini pusiki ianei ipapa apia puti tunna sanrei tewasi. ⁴Oyo ne mampusua tonu rei onoo Yesus waini ianamana runa Elia na Musa. ⁵Oyo Petrus iasau osi Yesus iahata, “Upuku Matuhetene, ita mai rei mo, iake nai osa maa. Nene iake mo, ami anana wanana tonu, na isa osi ano, isa osi Musa, isa osi Elia.”

⁶Iasau sanrei tau ianei tewa kahuræ iasau sae. Tau ia runa ne netau ua rei wasoni okaitau hunu ruao.

⁷Oyo yahu eresohiso samatoro oatinu nioke on pani yahu rei ereasau ata, “Ia reini mo, Au Anaku. Anoku runai. Oatinu tanui!”

⁸Oyo ono-noo suru roe suru poe san-sana ne onoo ia isa waini ikataso tewa nea. Hasae Yesus ruai mani. ⁹Ateso omusu on roe tinetae rei, oyo Yesus isoposo iahata, “Pene oeu oruni osi ia seia mani rerihoni onoo sae mai rei sinasi. Pene osima rotu-tu Au, Tumata Reini Mo, Anahatana Iratiku, uamahaiku honu.”

¹⁰Sio opusu ne maunaune rei, reiso osima osi ia isa tewa oi. Ne tonuso ruao oasei tau umau oahata, “Iasau ata mka iamahaiku honu. Areimo sapani?” ¹¹Reiso oasei tanui oahata, “Sio matuhete Musa ne maunauna oasau ata kahuræ Elia ihokai naone, nanie tahæ?”

¹²Iahata, “Titue. Mka Elia ihokai naone na ipamanisa pusire na iaka. Reiso sapani na sio okanu tau Anahatana ne anamanaya ata Au, Tumata Reini, Anahatana Iratiku, mka ounaku sinsaraku panesi runa sio openeso tanuku? ¹³Ne au mo, uasau osimo ata ia isa sani Elia ihokai nea. Ne sio ouna kahatene osiki opusu ruao no maue sani sae wani okanui tau Anahatana ne anamanaya nea rei.”

Yesus isuisene ia ikine isa waini sakahatene eresuniki

¹⁴Yesus runa ne mampusua tonu rei ohokaso poe sio mampusua tamena rei, oyo onoo ata sio hutue wasoni oamanouso poe rei. Sio matuhete Musa ne maunauna wasoni otuntana runa sio rei. ¹⁵Mata huni tewa oyo, sio pusiso onoo Yesus reiso osira, oyo orumaso mai tanui, nanie oatapeai. ¹⁶Yesus iasei tanuso iahata, “Omi wani otuntana runa sae tau sio reini?”

¹⁷Ia isa arihoni sio hutue rei iasau iahata, “Upuku Matuhetene, uautunu anaku mai tanua. Sakahatene eresuni anaku reini, reiso iakumoui. ¹⁸Sui supani mani sakahatene rei eresuniki, oyo ereunai ipesi ruai poe tuamane, kahusea rahokaso arihoni hohai, ereuna nesini ranotoso. Ereuna tinaini rerimuniki. Uainisi na me mampusua oneiki, ne okuai tewa.”

¹⁹Iahata, “Omi mo masike. Omi napisi reini mo, oparisaa tewa. Kahuræ urue ukatamo rotu-tu inasa? Kahuræ uapamesemo rotu-tu inasa? Oautunu ia ikine reino mai.”

²⁰Reiso oautunu ia ikine rei mai Yesus. Sakahatene rei erenoo Yesus, oyo ia ikine rei ikana-kananunui rotu-tu iamnohoi poe tuamane, ikama-kamauniki, kahusaia rahokai arihoni hohai. ²¹Oyo Yesus iasei tau ia ikine rei amai iahata, “Ia ikine reini san reini potuina nea?”

Iahata, “Upu. On ia ikine asi. ²²Sakahatene rei ereninai onone ranie, nanie erehunui reiso ereunai iamnohoi pani usa te pani waene. Ne kani ano amaha auna sae isa, uainisi arihonia na anomu runama na akahaima ee.”

²³ Iahata, “Ano asau kani umaha tau sae? Ita imaha iuna sae mani, hete sae, iparisaa.”

²⁴ “Uparisaa mkane. Akahaiku na uparisaa mainae.”

²⁵ Yesus inoo sio panesi ohokaso orumaso oamanouso, oyo iaisosi sakahatene rei. Isopoi iahata, “Ano sakahatene wani auna iakumoui runa iaririei, uaisosia ahokaya arihoni ia ikine rei na pene asuniki nea.”

²⁶ Iasau sanrei oyo sira tau sakahatene rei rekapona. Ereuna ia ikine tinaini erekana-kananunui, samatoro erehokai arihoni ia ikine rei. Erehokai oyo, onoo ia ikine rei noo sani matane, reiso sio panesi oasau oahata, “Ira oe! Imatai nea tea!”

²⁷ Ne Yesus irime hanai, ihetui, oyo ia ikine rei ihanui. Ihanui ihitio roe.

²⁸ Yesus inusui pani numa, oyo ne mampusua rei ruao ohokaso mai Yesus oasei tanui oahata, “Ami amaha anei sakahatene rei tewa tau sae?”

²⁹ Iahata, “Sakahate nitae reini mo, ineiki hasae tau mainisie mani.”

Yesus ianamana rerihoni mka sio ohunui

³⁰ Yesus runa ne mampusua rei oeuso oarihoni naniao rei, oyo oeuso sui oteo Galilea. Ne Yesus ipenei tau sio oanei ata ia wai pani ihokai nea. ³¹ Tea mo, nanie iatuhete ne mampusua ruao. Iahata, “Au, Tumata Reini, Anahatana Ihitiku, mka oruiku osi mansiau no kawasa, oyo ohunuku. Ne onona ua, oyo uamahaiku honu.”

³² Oanei tewa iasau sapani, ne omoniki, reiso oasei tanui tewa.

Pene otuntana rerihoni ia seia waini ia mainae

³³ Yesus sio ohokaso mai nia Kapernaum. Tau Yesus waipani numa nea iasei tau ne mampusua iahata, “Sinasi otuntana rerihoni sae poe arena tihue rei?”

³⁴ Ne oamaturuso mani. Tea mo, oaumaa osima tau sinasi poe arena tihue mo, otuntana rerihoni ia seia waini ia mainae nai osa. ³⁵ Iruiei poe, oyo ioi ne mampusua hutusa rahana ua rei. Hoka mai samatoro iaunauso. Iahata, “Ia seia nanie iuna mainae, kahuraa inuniki tau muie runa iakahai sio pusiso.”

³⁶ Oyo inana ia ikine isa iaunutui kua tihue, oyo ihetei. Iasau osiso iahata, ³⁷ “Ia waini anoi runa ia ikine sani reini noso anoi runaku, areimo sani anoi runa au sirinia. Ia waini anoi runa au, anoi runa au ruaku mani tewa. Areimo, anoi runa ia waini iaisosiku oi.”

³⁸ Oyo Yohanes iasau osi Yesus iahata, “Upuku Matuhetene, ami anoo ia isa inei sakahatena ihete ano nanamu. Ami asopoi. Tea mo, ia rei mo, arihoni ita tewa.”

³⁹ Iahata, “Pene osopoi. Sani ia isa iuna sima-simana ihete au nanaku, oyo sira tau ianamana khatene tanuku mo, tewa. ⁴⁰ Tea mo, ia waini ituntana runata tewa, areimo ita rei neta. ⁴¹ We anamanae reini mo anamana manisate. Ia waini iakahaimo mkane sani irui tihu kalasi taue isa osimo na oninu tau opusu Au, ia Anahatana Iratiku na Uapuheumo, mka ia rei, isupu sae wani Anahatana irui osi sio wasoni oanori runai rei osiki.”

⁴² Ia seia mani sani iuna sio ikina wasoni oparisaa tau au opalalosa, areimo nene iake sani okanihoo hatu mainae roe tionai, oyo opesiki nau nuae. ⁴³ Munata hanamu atue ereunaya apalalosa, areimo nene iake aroto rohai. Nene iake amahaia rotu-tu ria supani haineke Anahatana runa hanamu atue hae mani. Ne pene sio pesia poe usa mainae hainau arihoni Anahatana runa hanamu atua uare. Usa reimo, eremata tewa rotu-tu ria supani. ⁴⁴ [Poe rei, usa eremata tewa, uneu ramataso tewa.] ⁴⁵ Munata aima atue ereunaya apalalosa areimo, aroto rohai. Nene iake amahaia rotu-tu ria supani haineke Anahatana runa aimu atue hae mani. Ne pene sio pesia poe usa mainae hainau arihoni Anahatana runa aimu atua uare. ⁴⁶ [Poe rei, usa eremata tewa, uneu ramataso tewa.] ⁴⁷ Munata matamu usene ereunaya apalalosa, areimo apekui. Nene iake arue akata Anahatana tau

iuna natu mai tuniai reini runa matamu usene hae mani. Ne pene sio opesia poe usa mainae hainau arihoni Anahatana runa matamu usena uare. ⁴⁸ [Poe rei, usa eremata tewa, uneu ramataso tewa.]

⁴⁹ Ia seia waini ipusuku oyo sinsarai, mka uamanisai noso sinsarai. Nooi sani usa erepansani hunahane. ⁵⁰ Tasie iake. Ne munata ereniniki, ita iaiki iahana sani tasie tewa nea. Sani otutana rerihoni ia seia, ia mainae, omi iae noomo sani tasie ereniniki rei oi. Pene otutana runa umau. Orue anomo ramaturuso runa umau.”

Yesus iatuhete rerihoni ia isa iarihoni sahai

10 ¹ Yesus sio oeuso arihoni nia Kapernaum, nanie oeuso ria otoa wani nanae Yudea, oyo oeuso ria Wae Yordan ria hae. Hoka ria oyo, sio panesi ohokaso oamanouso mai Yesus. Iatuhetesano sanrei sirinia.

² Sio onata arihoni akama Yahudi ohokaso mai Yesus oreai, nanie onoo ata ia mo, ianamana pannuhu runa Musa ne maunauna te tewa. Reiso oasei tanui oahata, “Pusu Musa ne maunauna, Anahatana itapi ia isa ieu iarihoni sahai te tewa?”

³ Iahata, “Musa iaisosimo sapani?”

⁴ Oahata, “Musa itapi ia hanaie ikanu surate na iarihoni sahai, oyo iaisosiki ieu.”

⁵ Iahata, “Musa ikanu sanrei tau omi mo, anomo makaya runa omi openemo opusu Anahatana ne maunauna. ⁶ Ne on Anahatana ihaye tau tuniai reini mo oasau oahata, ‘Anahatana ihaye tau mansia pina runa mansia hanaie. ⁷ Reiso ia hanaie iarihoni inai na amai, oyo ikata sahai, ⁸ inoo uaso sani ia osa mani.’ Sio ua hanaie. Ne sio osa mani. ⁹ Reiso sae wani Anahatana iunai tau osa nea mo, pene mansia irohahi.”

¹⁰ Ta wasoni pani numa nea, oyo ne mampusua oasei tanui runa ne anamanaei rei. ¹¹ Ne Yesus iasau osiso iahata, “Sani ia hanaie isa ieu iarihoni sahai, oyo inana ia pina tamene isa, ia reimo isahu-sahu sahai. ¹² Sani ia pina isa ieu iarihoni sahai, oyo inana ia hanai tamene isa, ia iae isahu-sahu sahai oi.”

Ihokata mai Anahatana sani ia ikine

¹³ Taue isa sio umau orori sio ikina mai Yesus na iahusieso runa iainisi na Anahatana irui iake osiso. Ne sio mampusua oakapuku tanuso. ¹⁴ Yesus iatinu sanrei, anoi eresaa. Iahata, “Sio ruao. Sio ikina mo, ohokaso mai tanuku iake. Nanie osoposo tau sae? Tea mo, sio wasoni sani sio ikina rei, mka orue okata Anahatana tau irime tuniai reini. Sio ikina oararuma Anahatana iake. ¹⁵ Nene manisate, ia waini ipenei itapi Anahatana irimei sani ia ikine itapi amai irime, ia mo, mka irue haineke Anahatana tewa.”

¹⁶ Oyo ihete sio ikina rei samatoro iahusieso. Iahusieso, oyo iainisi osiso. Iahata, “Ama. Uainisi na arui iake osi sio ikina reini na okarihuru oamahai.”

Ia kaya

¹⁷ Yesus iainisi osi sio ikina pusi, oyo nanie ieu. Ne sira tau ia isa irumai mai tanui. Irike tune mai uai anoe, nanie iamuirai, oyo iasei tanui iahata, “Upuku Matuhetene, ano mo, ano iake. Kahuraa au una sae na uamahaiku rotu-tu ria supani?”

¹⁸ Iahata, “Ano asau ata au iake, nanie tahae? Ita tumatau mo, ita iaka tewa. Hasae Anahatana ruai mani sahoro ia iake. ¹⁹ Ano anei Anahatana ne maunauna nea, ‘Pene ohunu. Pene osahu-sahumu. Pene kimanaka. Pene oanamana oakarota. Pene oruma orori mansia no kepeni. Oamuiru moa inau moa amau.’”

²⁰ Iahata, “Upuku Matuhetene, upusu pusi maunauna rai nea on au ikine asi.”

²¹ Yesus iasumatai. Anoi runai. Iahata, "Hasae nesie maunaune osa asi wani kahurae apusui. Maunaune reimo, aeua na aheni pusi me numa hutae. Aheni pusiki, oyo asama pusi nene kepeni rai osi sio mosokinia na asupu arataeu roe noiya. Oyo aeua mai na apusu au."

²² Oyo ikanahatai. Ieui arihoni rei runa anoi mtinte. Areimo, tau anoi runa ne numa hutae mainae rei.

²³ Yesus inoo neka ne mampusua, oyo iasau osiso iahata, "Anahatana irime tuniai reini, sio kaya opusu mtinte."

²⁴ Taa oatinu tau ne anamanaya rai, oyo ne mampusua osira. Ne Yesus isakanau ne anamanae honu iahata, "We hehuka, opusu tau Anahatana irime tuniai reini mtinte. ²⁵ Areimo sani unta, makapana mainae rei wani nene totu unie mo, nene pupua sonota. Unta erenusui sui sisunue matae mo, mtinte. Ne sio kaya opusu tau Anahatana irime tuniai reini mo, mtinte erenesi rei."

²⁶ Oatinu sanrei, osira hun ruao. Reiso oasei tau umau oahata, "Ira oe. Mka Anahatana iapuheu ia seia na irime tuniai reini ipusu oi?"

²⁷ Yesus inooso honu, iahata, "Mansia mo, oanei opapuheu ruao tewa ne Anahatana ianei pusire."

²⁸ Oyo Petrus iasau iahata, "Ami reini mo, aeua arihoni ma sae mani na apusua."

²⁹ Iahata, "Uasau osimo. Sio wasoni oeu oarihoni no niane, noa kaka-wani, noa mansia mainaya, no hehuka, no atuhua ai nohua rusuni pusakau iae, noso anoo runaku na nanie oau nau mansia tau Sou lake. ³⁰ sio rei mo, pani muie, mka osupu panesi arihoni sae waroni oarihoni rei. Mka osupu niana utuni, noa kakaawani utuni, noa inau utuni, sio ikina utuni, nisiu utuni. Ne mka sio umau ouna sinsaraso noso oparisaa tau au. Oyo mka oamahaiso rotu-tu ria supani pani muie rei. ³¹ Ne sio panesi wasoni oahata sio mainaya nea, mka sio mainaya tewa nea. Samatoro sio panesi wasoni muie rei oahata sio mainaya tewa, mka sio mainaya nea."

Yesus isima honu rerihoni mka sio ohunui

³² Yesus sio wasoni oeu roe kota Yerusalem. Ia ieu ianaone, ne mampusua oeu hae muie. Sio osira. Samatoro sio wasoni opusu hae muie okaitau. Oyo Yesus inana ne mampusua ruao nanie isima osiso rerihoni mka ia sapani. ³³ Iahata, "Atinu. Ita wani ieu roe Yerusalem. Roe rei, Au, Tumata Reini, Anahatana Ihitiku, mka oruiku osi sio onata arihoni sio wasoni osaka okenu makapanau osi Anahatana runa sio matuhete Musa ne maunauna. Mka oasau ata kahurae ohunuku, oyo oruiku osi sio wasoni oationa Anahatana tewa. ³⁴ Oyo sio rei oamaniku, ohutoku, osapuku tau awane unia, oyo ohunuku. Oyo onona ua, uamahaiku honu."

Yakobus runa Yohanes nanie ouna aiau okata Yesus tau iuna natu

³⁵ Zebedeus ne hehuka, Yakobus runa Yohanes, ohokaso mai Yesus. Oasau osiki oahata, "Upuku Matuhetene, ami nanie ainisi sae isa arihonia na aunai osima."

³⁶ Oyo Yesus iasei tanuso iahata, "Onina na uuna sae osimo?"

³⁷ Oahata, "Ami nanie auna aiau na aruema akataya, ia isa hae hanamu wanane, isa honu hae hanamu pante pannuhu sio pusiso oanei ata ano auna natu tau sio pusiso."

³⁸ Iahata, "Oanei tewa oainisi sae. Oamkona opamese sinsaramo rotu-tu omatamo sani mka umataku?"

³⁹ Oahata, "Ami amkona apamese."

Iahata, "Titue. Omi mka sinsaramo rotu-tu omatamo sani mka umataku. ⁴⁰ Ne rerihoni ia seia mka iruei mai hanaku wanane runa hanaku pante, au we kawasa

uasau tewa. Anahatana sahoro iasau ia seja sahoro iuna aia ikata au. Ianei nea ia seja sahoro ihitiki.”

⁴¹ Sio mampusua nesia hutusa rei oatinu sanrei, oyo anoo rasaa tau Yakobus runa Yohanes. ⁴² Reiso Yesus ianaha runa sio pusiso, iasau iahata, “Omi oanei ata sio kupania arihoni niana wasoni oationa Anahatana tewa ouna mtinte tau no mansiau. Sio rei sahoro no kawasa oaisosi no mansiau suru ria suru nau sui osa. ⁴³ Ne omi pene mo hali sanrei. Ia seja mani arihoni omi nanie iuna mainae, kahuræ ia rei ianori runa ia seja mani. ⁴⁴ Ia waini nanie iuna mainae arihoni omi, kahuræ iuna manorine tau ia seja mani. ⁴⁵ Ne Au, Tumata Reini, Anahatana Ihitiku iae, uhokaku na mansia oanori runaku tewa. Uhokaku na uanori runa mansia, oyo umataku na usi sio panesi no rosau.”

Yesus isuisene Bartimeus

⁴⁶ Yesus iaunau ne mampusua pusi, oyo oeuso na pani nia Yerikho. Taa pannuhu Yesus, ne mampusua, runa sio hutue wasoni nanie ohokaso arihoni niane rei, ia mata putie isa waimo iru-ruei noi arena nusue, iai-ainisi kepeni arihoni sio wasoni oniku ria nau noi rei. Ia mata putie reimo, nanai Bartimeus. Amai tau Timeus. ⁴⁷ Latinu ata Yesus, ia Nazaret, waini inikui, reiso iakapona, “Yesus, Daud upui, anomu runaku.”

⁴⁸ Sio panesi osopoi, oaisosiki iamaturui. Ne masike osopoi iae, iakapona mainae sirinia, “Daud upui, anomu runaku.”

⁴⁹ Oyo Yesus iataehe, oyo iasau, “Ooiki mai.”

Reiso sio ooi ia mata putie rei. Oahata, “Apamese anomo. Yesus waini ioia, hitio roe.”

⁵⁰ Ia mata putie rei ipesi ne papite osa, oyo ihitio san-sana na ieu mai Yesus.

⁵¹ Yesus iasei tanui iahata, “Au nanie una sae osia?”

Iahata, “Upuku, au nanie unoo.” ⁵² Iahata, “Aparisaa tau au, reiso ano iake nea.” Inoo iake san-sana. Inoo iake, oyo ipusu Yesus sui arena rei.

Yesus inusu kota Yerusalem

11 ¹ Yesus sio oeuso arihoni nia Yerikho, oyo oeuso na pani kota Yerusalem. Sio wasoni haineke kota Yerusalem nea, mai nia Betfage runa Betania, mai Pupue Zaitun nene sanene aikune. Panrei Yesus iaisosi ne mampusua ua oeuso oanaoneso. ² Iahata, “Oeumo nau niane wanau uae reinau. Mka onusumo nau niane rei, oyo onoo makapana isa nooi sani naitana ikine. Sio okanihooi nea. Ia isa isaa makapana rei tewasi. Osuhai, oyo onesai mai. ³ Sani munata sio umau oasei tanumo, oahata, ‘Osuha makapana rei, nanie tahæ?’, areimo asau osiso sanrei, ‘Mania upu nanie isaai. Mka san-sana oyo ieu mai iuniki osimo.’”

⁴ Reiso uaso oeuso. Hoka nau oyo, osupu makapana rei. Sio okanihooi mai numa mitanunue nea, pakarema arena nusue. Reiso uaso osuhai. ⁵ Osuhai oyo, sio umau wasoni ooso pani rei oasei tanuso oahata, “He. Ouna sae reino? Osuha makapana rei, nanie tahæ?”

⁶ Oahata, “Mania upu nanie isaai. Mka san-sana mai, iuniki.”

Reiso sio rei osoposo tewa nea. Oyo uaso onesa makapana rei.

⁷ Hoka ria Yesus, oyo oaunutu no papita osa roe nene totu hahæ samatoro Yesus isaai. ⁸ Sio panesi orata no papite osa poe arena. Sio umau honu orata ai sana mataya poe arena. Ai sanaya rai mo, ororire on noi nisiu. Orata papita runa ai sanaya sanrei tau sio nanie oamuiira Yesus sani oamuiira sio onata runa aiau. ⁹ Yesus isaa makapana rei roe papita runa ai sanaya nanie inusui pani Yerusalem. Sio umau oeu roe uae, sio umau hae muie. Mansia pusiki oakapona. “Ainaa runa Anahatana. Arui iake osi ia waini ihokai tau mania Upu nanai. ¹⁰ Ia reimo ihokai,

mka iuna natu sani masuae mania upu Daud, ia aia. Ainaa runa Anahatana waini ia mainae nai osa.”

¹¹ Reiso Yesus ihokai mai Yerusalem. Hoka mai, oyo inusui pani Anahatana ne numa mainisie. Inusui pani numa anoe, oyo ino-noo, iarinii neka pusi numa anoe. Ne haineke pumono nea, reiso ieu i ria nia Betania ikata ne mampusua hutusa rahana ua rei.

Yesus iainisi runa ai

¹² Nene hanu roe sanrei, Yesus sio oeuso oarihoni nia Betania, oyo Yesus imakaneai. ¹³ Oni pani hainau asi inoo ai tinaie isa. Ai rei nene totua panesi. Reiso ieu i pani hainekei na nanie inoo ata kani huae te tewa. Ne ihokai noi ai rei nusue, isupu ai rei huae isa tewa nai osa. Hasae nene totua mani. Tea mo, ai rei nene nanie tewasi. ¹⁴ Oyo Yesus iasau osi ai rei iahata, “Tau ranie hatae rei pani sirinia, ia isa mani pene iai me huaya nea!”

Yesus ne mampusua oatinu ne anamanae rei.

Yesus inei sio umau arihoni Anahatana ne numa mainisie

¹⁵ Yesus sio ohokaso roe kota Yerusalem. Hoka roe oyo, Yesus ieu honu roe Anahatana ne numa mainisie. Hoka roe numa rei nene nusue, oyo inei sio umau wasoni oaheni runa ohoka ohane roe tihue rei. Luni hehi meya waroni otuka kepeni tanure. Luni hehi sio manaheni manu puane no katerau oi. ¹⁶ Anahatana itapiso orori sae mani pusu Anahatana ne numa nusue tewa. ¹⁷ Oyo Yesus iatuhete sio panesi kua tihue rei. Iasau, “Tau Anahatana ne anamanaya, sio okanu sanrei, Anahatana iasau iahata, ‘Au we numa, mka sio ooiki tau numa mainisie osi mansia mai tuniai pusiki.’ Ne omi ouna Anahatana ne numa mainisie sani sio kimanakana naniao!”

¹⁸ Sio onata arihoni sio wasoni osaka okenu makapanau osi Anahatana runa sio matuhete Musa ne maunauna oatinu tau rei. Reiso onina arena nanie ohunu Yesus. Oanana tanui tau sio mansiau pusiso osira oatinu ne anamanaya.

¹⁹ Ne nene pumono pani sanrei, Yesus runa ne mampusua oeuso oarihoni kota rei.

Ai eremeniki

²⁰ Hanroe omnano tunne oyo, Yesus sio nanie oeuso. Oeuso oniku ai wani Yesus iainisi runai rei. Oyo sira tau onoo ata ai rei eremeniki nea. Nene namta iae rakaimeni pusire oi. ²¹ Oyo Petrus anoi erepeka runa Yesus ne anamanae wani potusi rei, oyo iasau osi Yesus iahata, “Upuku Matuhetene. Masi anoo! Ai wani ano aainisi runai potusi rei, eremeniki nea!”

²² Iahata, “Kahurae omi oparisaa tau Anahatana. ²³ Nene manisate, omi oasau tau tinetae reini, ‘Ahitioa. Apesi ruamu nau nuae!’ Mka tinetae rei erepesi ruae nau nuae, hete sae, omi pene ouna pie-pie. Hete sae, oparisaa ata wani oasau rei ata oaisosi tinetae rei erepesi ruae nau nuae, mka erepesi ruae. ²⁴ Anomo rapeka. Munata oainisi sae isa arihoni Anahatana, kahurae oparisaa ata mka iruiki osimo sirinia. Oparisaa, mka osupui. ²⁵ Sani oainisi, ne anomo ramaturu tewa tau ia isa waini iuna isanae tanumo, kahurae pene anomo rasaa tewa nea na moa Ama roe noiyaha iae isiru heu mo isanaya. ²⁶ [Sani anomo rasaa tau ia waini iuna sana tanumo sirinia, moa Ama roe noiyaha iae, ipenei isiru heu mo isanaya.]”

Sio ona Yahudiu oasei Yesus isupu kawasa arihoni ia seia

²⁷ Yesus sio ohokaso mai kota Yerusalem honu. Oyo tau waini ieu ihori pani Anahatana ne numa mainisie nene nusue, sio onata arihoni sio wasoni osaka

okenu makapanau osi Anahatana, sio matuhete Musa ne maunauna, runa sio ona Yahudi nesia rei ohokaso mai tanui. ²⁸ Hoka mai oyo, oasei oahata, “Asupu me kawasa rei arihoni ia seia na auna sanrei? Ia seia irui kawasa osia?”

²⁹ Iahata, “Au nanie uasei honu tau pusimo utumo. Omi osima e, samatoro au usima runa usupu kawasa arihoni ia seia na una sanrei. ³⁰ Ia seia sahoro iaisosi Yohanes isohu mansia na sio onoo ata Anahatana iheu no rosau nea? Anahatana te? Mansia te? Masi oasau.”

³¹ Oyo otuntana runa umau oahata, “Munata iasau ata Anahatana sahoro irui kawasa osiki na isohu mansia mka iasei tanuta ata iparisaa tau Yohanes tewa tau sae. ³² Ne munata iasau ata arihoni mansia, areimo imatata.”

Okaitau pene rotu-tu sio panesi oakapuku tanuso. Sio panesi oahata, “Yohanes mo, ia mamsima runa Anahatana ne maunauna isa.” ³³ Reiso oasau oahata, “Ami anei tewa.”

Yesus iae iahata, “Reiso au iae upeneku usima runa usupu we kawasa on supa na una sanrei.”

Yesus iaunau sio wasoni openeso tanui tau mamruni matuhetena

12 ¹ Yesus iaunau sio mamruni matuhetena. iaunau sio onata arihoni sio wasoni osaka okenu makapanau osi Anahatana, sio onata, runa sio matuhete Musa ne maunauna. Iahata, “Ia isa irahu nisi. Irahu nisi rei, tau atuhu anggur. Inana tone erehori nisi rei, oyo ikani nonu na oheta tau anggur nene huaya rotu-tu nene sanaute erehokai poe nonu anoe rei. Oyo inana numa wani hatu naue isa na osaka nisi rei roe nene hahae, samatoro inina sio umau na osaka ne nisi rei runa osama nene huaya osiki. Osaka samatoro ieu arihoni otoi rei.

² Tau musum tinou nene nania nea, iaisosi ne manorine isa na ieu ria sio mamsaka nisi rei, nanie inana ne huaya umau. ³ Oyo suru ria ieu. Ieu rotu-tu ihokai ria, oyo sio mamsaka nisi rei osotai. Ohitai, oyo oaisosiki inuni nakui.

⁴ Ita iaisosi ne manorine isa honu. Ita suru ria ieu. Ieu rotu-tu ihokai ria. Sio oamuirai tewa, reiso sio ohitai rotu-tu ne apate roe unui.

⁵ Ita iaisosi ne manori tamene isa honu. Ita suru ria ieu. Ieu rotu-tu ihokai ria, oyo ohunui. Ita iaisosi sio panesi, ia isa pusu ia isa. Ne sio umau mo, ohitaso, sio umau, ohunuso. ⁶ Iaisosi rotu-tu pusiso. Kani iaisosi ia seia honu? Nesi ia osa mani mai ne numa. Ia rei, ia ruai anai hanaie. Anoi runai. Iasau pani anoi iahata, ‘Sani anaku ruai iau areimo, mka oamuirai.’ Reiso iaisosi ruai anai. ⁷ Ieu honu, oyo onooi samatoro oasau mai umau. Oahata, ‘Ia reimo, anai ruai. Mka imatai, anai rei isupu ne tuamane rei. Mai, na ihunui na ruari isupu tuamane reini.’ ⁸ Reiso osotai na ohunui, oyo opesi hatai rei pani manahane arihoni nisi rei.

⁹ Ia waini ne tuamane rei, mka iuna sae? Ihokai mai nisi rei, ihunu sio mamsaka rei, oyo inana sio tamena osaka ne nisi honu. ¹⁰ Onoo tau Anahatana ne anamanaya tewa sou wani ereasau sanrei?

‘Hatu wani sio mamnana numa openeso tanui
ereuna hatu tinipae nea.

Ereuna numa makae nea.

¹¹ Upuri iuna sanrei mo,
inooi iake.”

¹² Reiso sio onata oatinu mamrunie rei nanie oaresi Yesus. Oahata Yesus ianamana tanuso. Sio sani sio mamsaka nisi runa sio mamnana numa. Tea mo, openeso tau Yesus. Ne okaitau sio panesi, reiso oeuo oarihoni Yesus.

Sio onata oamanaru Yesus ata ianamana kahatene rerihoni natu Roma

¹³ Sio onata oaisosi sio onata arihoni akama Yahudi umau runa Herodes ne mansiau umau mai Yesus, nanie oasei tanui na osotai ianamana kahatene rerihoni natu Roma. ¹⁴ Ohokaso mai Yesus, oahata, “Upuku Matuhetene. Ami anei ata ano mo, ano manisate. Anomu reuponu tewa rerihoni mansia inooa sapani. Anooma pusima osa, ia isa mo, ia mainae tewa. Ano atuhetema pannuhu tau Anahatana ne maunauna. Anahatana itapita isenu pea osi Kaisar te tewa? Kahuraa isenui te tewa?” (Kaisar mo, ia natu tau sio Roma no tuamane pusire. Oaol sio no natu tau Kaisar.)

¹⁵ Ne Yesus ianei ata oasei reai, reiso iasau iahata, “Omi nanie osotaku, nanie tahae? Masi orori kepeni inate isa mai na nooi.”

¹⁶ Reiso orui kepeni inate isa osiki, oyo iasei, “Ia seia siaini reini? Okanu ia seia nanai tanui?”

Oahata, “Kaisar.”

¹⁷ Iahata, “Reiso osenu osi natu Kaisar pusu sae wani ia ne kawasa iainisiki. Orui osi Anahatana pusu sae wani ne kawasa iainisiki.”

Osira oatinu tau rei.

Sio Sadukiu oasei rea tau Yesus

¹⁸ Sio Sadukiu umau ohokaso mai Yesus. Sio rei oahata sio matana mo, oamahai tewa honu. Reiso oasei sanrei, ¹⁹ “Upuku Matuhetene. Masuae Musa ikanu sanrei, ‘Munata ia hanaie isa imatai, sahai isusu tewa, kahuraa wanini inana ia pina uhanu rei na isusu, oyo onoo sio ikina sani kakai waini imatai rei ne hehuka.’ ²⁰ Reiso sani ia hanaie isa nea waniu sio nome. Ia rei, ia manaonetete, iausahai, oyo imatai iarihoni sahai. Sahai rei isusu tewasi. ²¹ Ita wanini inana kakai sahai rei honu. Ita wanini rei imatai iarihoni ia pina rei honu. Ia pina rei isusu tewasi. Ita wanini ia isa honu inana ita sanrei sirinia, ²² rotu-tu ituso sanrei. Oyo tau muie ia pina imatai honu. ²³ Tau ranie hatae rei sio matana oamahaiso honu, ia pina rei, sahai tau ia seia? Ituso onana ia pina rei nea!”

²⁴ Iahata, “Omi osana rerihoni sio matana oamahaiso honu, sio sapani. Oanei tewa Anahatana ne anamanaya raasau sapani. Oanei tewa Anahatana ne kawasa sapani. ²⁵ Mka sio matana oamahaiso honu, oausahaso tewa nea. Sio sani Anahatana ne maisosia on roe noiyaha. ²⁶ Rerihoni sio matana oamahaiso honu, onoo tau Musa ne anamanaya tewa? Ikanu ata tau Anahatana ianamana osiki on pani ai pukune rei, wani usa ereai tanui iahata, ‘Au reini mo, au Anahatana wani Abraham iainaa runaku. Ishak iainaa runaku. Yakub iainaa runaku.’ ²⁷ Masike tonuso omataso nea, Anahatana inooso sani oamahaiso. Reiso ia mo, ia waini Anahatana tau sio matana tewa. Ia Anahatana tau sio wasoni oamahaiso. Omi osana oasau ata sio matana oamahaiso tewa honu.”

Ia matuhete Musa ne maunauna isa nanie ianei maunau sae wani mtinte

²⁸ Nene poua sanrei, oyo ia matuhete Musa ne maunauna isa iatinu sio otuntana. Iatinu ata Yesus isana tau sio Sadukiu arihoni akama Yahudi iake. Reiso iasei tanui iahata, “Upu. Maunau sae wani mtinte erenesi maunauna pusire?”

²⁹ Iahata, “Maunau mtinte wani sanrei, ‘Atinu omi Israel! Upuri Anahatana, ia osa mani. ³⁰ Anomu runa Upumu Anahatana runa anomu pusiki, runa me inaha pusiki, anomu erepeka runai sui osa, anana tanei osiki sui osa.’ ³¹ Maunau mtinte isa honu, areimo sanrei, ‘Anomu runa sio pusiso sani anomu runa ruamu.’ Maunauna ua rai sahoro mtinta ranesi maunauna pusire.”

³² Iahata, “Titue, matuhetene! Ano asau manisate ata Upuri Anahatana ia osa mani runa anahatana tamene isa waimo tewa nea. ³³ Kahurae anori runa Anahatana runa anori pusiki, iariniiki sui osa, ianori runai sui osa, anori runa sio pusiso sani anori runa ruari. luna sanrei iake erenesi iakanupu makapana sae mani te irui sae mani osi Anahatana.”

³⁴ Yesus iatinu ata isana iake nai osa, reiso iahata, “Ano haineke nea na mka apusu tau Anahatana irime tuniai reini.”

Oyo sio pusiso okaitau oasei tau Yesus nea.

Yesus iasei tau sio onata honu

³⁵ Yesus waini iatuhete pani Anahatana ne numa mainisie nene nusue, oyo iasei sanrei iahata, “Sapani na rotu-tu sio matuhete Musa ne maunauna oasau ata la waini Anahatana Iratiki Iapuheuta rei mo, ia Daud upui? ³⁶ Aikee Anahatana Ne Inaha iuna Daud ruai iasau iahata,

‘Anahatana iasau osi Upuku:

Rue hae hanaku wanane

rotu-tu ano aheta tau me nisau.’

³⁷ Reiso munata Daud ruai ioi la waini Anahatana Iratiki tau Upui sani ia sahoro ia manaonete, sapani na ia hasae Daud upui muie mani?”

Sio hutue oatinui iake.

³⁸ Iasau honu iahata, “Ainati runa sio matuhete Musa ne maunauna. Onina na mansia pusiso onooso sani sio mainaya, reiso oeu oausahu papi naua runa onina na sio pusiso oauhaaso sani sio mainaya sui pasar. ³⁹ Nanie orue tau sio mainaya no katerau pani numa mananoune osi sio Yahudiu. Tau karisaa, nanie orue tau katerau waroni oanuture osi sio wasoni oamuiraso. ⁴⁰ Aikee oakarota sio pina uhanu na onana no numau pusire. Oainisi roe hohao mani rotu-tu potuina ne oainisi pani anoo tewa. Mka Anahatana iapasanaso mtinte.”

la pina uhanu irui kepeni panesi osi Anahatana

⁴¹ Yesus waini iru-ruei pani Anahatana ne numa mainisie. Iruei iamanane peti wani oaiinu kepeni na oruire osi Anahatana. Iasumata sio onusu no kepen tanui. Sio kaya panesi onusu kepen panesi. ⁴² Oyo ia pina uhanu isa ihokai. la pina rei mo, imosokiniki. Inusu kepen ikina, ina ua mani. Areimo kepen panesi tewa, mkana mani. ⁴³ Oyo Yesus ioi ne mampusua, iahata, “Masi onoo. la pina uhanu waini imosokiniki rei, inusu kepeni panesi erenesi sio kaya pusiso. ⁴⁴ Sio kaya rei orui no kepen nesia mani. Ne ia pina waini iauhanui rei irui ne kepen pusire. Kani iai sae honu?”

Yesus ianamana rerihoni kakinate rerihoni tuniai reini erepena

13 ¹ Yesus runa ne mampusua oeu arihoni Anahatana ne numa mainisie nusue, oyo ne mampusue isa iasau sanrei iahata, “Upuku Matuhetene, masi anoo. Anahatana ne numa mainisie rei, iake. Sio onanai tau hatu maina-mainaya waroni iaka.”

² Iahata, “Onoo numa mainaya rai? Mka sio okuka Anahatana ne numa mainisie reini na hatu rai ratanuhaha tewa nea. Hatu rai rakukaso rarihoni nahaya.”

³ Oyo Yesus ieu roe pupue wani nanae Zaitun. Hoka roe oyo, iruei iamanane Anahatana ne numa mainisie pani ekote hanae pani hae. Oyo Petrus, Yakobus, Yohanes, runa Andreas ohoka mai tanui, nanie oasei tau sio ruao okatai. ⁴ Oasei sanrei, “Masi asau mai. Inasa sio okuka Anahatana ne numa mainisie sani ano asau rei? Mka anoo akakinate sae naone na anei ata sio nanie okukai nea?”

⁵ Iahata, "Osaka-saka na pene sio oakarotamo oahata, "Tuniai reini erepena nea." ⁶ Mka sio panesi ohokaso ohete au nanaku oasau oahata, 'Au mo la waini Anahatana Iratiki Iapuheu Mansia' oyo oakarota sio panesi. ⁷ Munata oatinu sio osima runa manahitana mo, pene okaitau. Kahuræ sanrei, aikee tuniai reini erepena tewasi. ⁸ Mataanoë kupaniau oatana runa umau, niana oatana runa umau. Mai tuniai reini mo, isu sui supan-supani. Sio panesi omakaneaso. Tea mo, osupu muaine tewa nea. Ne areini mo, pusire nene aikune mani sani ia ikine nanie iamrae inai tiai ereuni.

⁹ Kahuræ osaka-saka. Mka sio osotamo na oruimo osi sio mainaya tau niana. Mka ohitamo sui numa mananouna osi sio Yahudiu. Mka ororimo oamanane sio no kawasa runa sio aiau noso oparisaa tau au. Reiso osaka oaunauso rerihoni au.

¹⁰ Kahuræ oaunau sio niana pusire mai tuniai reini tau Sou lake naone. ¹¹ Mka oaresimo, oyo ororimo oamanane sio onata, pene anomo rauponu runa mka oasau sapani. Mka Anahatana iasau osimo kahuræ oasau sapani. Omi ruamo oanamana tewa, ne Anahatana Ne Inaha mka irui anamanaya osimo. ¹² Mka kakai irui wanini waini iparisaa tau au osi sio ohunui. Wanini irui kakai waini iparisaa tau au osi sio ohunui. Sani rei honu runa amai runa ne hehuka. Sio ikina mka orui noa ama runa noa ina osi sio umau na ohunuso. ¹³ Mka sio pusiso openeso tanumo noso oparisaa runa au. Ne ia seia iapamese rotu-tu imatai, mka iamahaiki rotu-tu ria supani haineke Anahatana.

¹⁴ Mka onoo sio oapuooh khatene wani ereuna Anahatana ieu arihoni ne numa. Anahatana isopo na pene oapuoohi pani ne numa rei. (Ano wani anoos surate rei, atinu ia-ia na anei.) Sio oapuoohi, oyo kahuræ sio pusiso sui Yudea orumas roe tinetaya. ¹⁵ Sio wasoni oru-rueso roe ainata hahaya pene osipuso, pene onusoso pani no numau honu na onana no apia. ¹⁶ Sio noi nisiu pene onuniso, pene onana no papita. ¹⁷ Sio wasoni tiao te wasoni osusu sio ikina asi pani muie reimo siraka. Oruma iake tewa. ¹⁸ Ainisi na pene sanrei tau ihate. ¹⁹ Pani muie reimo, sinsaraso mainae sani sio sinsaraso tewasi on tuniai reini remrae asi. Oyo pani muie honu sinsaraso tewa nea. ²⁰ Ne mka Anahatana anoi erepeka runa sio wasoni ininiso na oparisaa tanui. Reiso itapiso sinsaraso rotu-tu potuina tewa. Sinana sinsaraso rotu-tu potuina, mka ia isa iamahaiki tewa nea.

²¹ Tau napisi reimo, mka ia isa iasau osimo iahata, 'Masi onoo. Ia waini Anahatana Iratiki Iapuheu Manisa waini ihokai nea' te ia isa honu iahata, 'Mai, ia wai pani rei.' Pene oparisaa tau sio rei. ²² Tau sae? Sio umau mka ohokaso oasau oakarota ata sio rei wasoni la waini Anahatana Iratiki Iapuheu Mansia te sio wasoni ia mamsima runa Anahatana ne anamanaya umau. Mka ona kakinata sani sio no kawasa on roe Anahatana runa sima-simana na sio wasoni onooe osira. Oakarota rea sio wasoni Anahatana ininiso na oparisaa tau ia. ²³ Reiso osaka-saka. Uatuhetemo nea, tuniai reini mo erepena sapani on erepena tewasi.

²⁴ Tau napisi reimo, sinsaraso, oyo ranie erepumono, hunane rerihui. ²⁵ Oneu ramnahuso on roe nante runa sae wani roe nante rakoka pusire. ²⁶ Oyo sio pusiso onoo Au, Tumata Reini, Anahatana Ihitiku uhokaku pani yahu tihue runa we kawasa. Onoo au uita-itaku. ²⁷ Mka uaisosi we maisosia on roe noiyaaha na oamanou sio wasoni Anahatana ininiso na oparisaa tau ia. Oamanouso on nau, on ria, on poe, on pani, oyo on pani tuniai nene rurue rotu-tu roe nante nene rurue.

²⁸ Sani inoo roe ai isa na inooi marae nea, inoo nene kataunua manna nea, oyo mato resinieui honu, inoo sanrei ianei ata ihate erehokai nea. ²⁹ Sani rei oi tau tuniai reini erepena. Onoo sanrei mo, oanei ata mata huni tewa oyo, tuniai reini erepena. ³⁰ Uasau osimo. Sio pusiso wasoni oamahaiso muie reini mo, omataso tewasi samatoro sinsaraso sani wani uasau reini. ³¹ Nante runa tuniai reini mka ranikuso, ne au we anamanaya mka ranikuso tewa.

³² Ia seia mani iae ianei tewa inasa mka sio sinsaraso sanrei. Sio maisosia roe noiyaha iae, oanei tewa oi. Au Anahatana Anai iae uanei tewa. Hasae amaku ruai mani sahoro ianei. ³³ Reiso oainati. Osaka-saka. Oanei tewa inasa uhokaku honu. ³⁴ Areimo sani ia isa ieu iarihoni ne numa, oyo ieu i hainau. Ia rei iaisosi ne manorina. Iruai kawasa osiso na osaka ne numa rei. Sio pusiso osupu no taneiu. Iaisosi ia mamsaka mitanunue isakai ia-ia. ³⁵ Reiso osaka-saka. Oanei tewasi inasa numa upue inuniki. Kani tau ranie manne te? Tau saa monon tihu te? Tau manua ratunkeko te? Tau ranie eresaa te? Oanei tewa. ³⁶ Pene rotu-tu uhokaku omi osaka tewa, oyo usupu pusimo onekemo. ³⁷ Sae wani uasau osimo reini mo, uasau osi sio pusiso, osaka-saka.”

la pina isa isona mina roe Yesus unui

14¹ Nesi onona ua mani samatoro karisaa anoo rapeka runa noa upu oeu oarihoni Mesir runa karisaa sio Yahudiu oai poroti wani eresaa tewa. Sio onata arihoni sio wasoni osaka okenu makapanau osi Anahatana na sio matuhete Musa ne maunauna wasoni onina arena, nanie osota Yesus puru-purumene na ohunui. ² Oahata, “Ne pene isotai tau karisaa rei. Tea mo, mka mansia pusiso oatanaso. Openeso oatinu tau ita.”

³ Tau rei, Yesus waira nia Betania, ria Simon ne numa. Ia mo, naone ikupu muhune. Oyo ia pina isa ihokai mai Yesus irori potone. Potone rei, ounai arihoni hatu. Oapataui tau mina. Mina rei, ounai arihoni ai namte. Yesus waini iaiki, oyo ia pina rei ihoka, ikuparehi potone tionae, samatoro isona mina rei roe Yesus unui.

⁴ Sio umau ria rei oakapuku tanui, reiso oasei mai umau oahata, “Ia pina rei iuna sai-sai mina sanrei, nanie tahae? ⁵ Mina rei mo, sani oaheniki, osupu kepeni panesi. Kepeni sani ia isa isupu tau musum osa. Kepeni rai, sio mka oruire osi sio mosokinia!” Reiso oakapuku tau ia pina rei.

⁶ Ne Yesus iasau osiso iahata, “Ia ruai! Omi nanie oakapuku tau ia pina rei, nanie tahae? Ia ne hali sanrei osiku, areimo iake. ⁷ Sio mosokinia wasoni okatamo sui osa. Kani mo maue, omaha oakahaiso sui osa. Ne au mka ukatamo sui osa tewa. ⁸ Ia pina rei iuna nea. Luna pusire waroni imaha iunare. Mka umataku, oyo oanutuku, ne ia pina rei isonaku tau mina ipusu monne naone nea. ⁹ Manisate. Sui supan-supani mani mai tuniai reini, sio oanauso tau Sou lake, mka oatinu rerihoni ia pina rei na anoo rapeka runai.”

Yesus iaiki ikata ne mampusua

¹⁰ Yudas Iskariot, ia mo, ia isa arihoni sio mampusua hutusa rahana ua rei, ieu i pani sio onata arihoni sio wasoni osaka okenu makapanau osi Anahatana, nanie iaheni Yesus osiso. ¹¹ Sio nanie ohunui, reiso oatinu tau anamanae rei iake. Oahata, “Mka arui kepeni osia.”

Reiso Yudas inina arena, nanie iaheni Yesus osiso.

¹² Tau ranie hatae mataano e arihoni karisaa sio Yahudiu oai poroti wani eresaa tewa. Tau ranie hatae rei sio ohunu rompau. Tau sae? Anoo rapeka runa noa upu oeu oarihoni Mesir. Tau ranie hatae rei, sio mampusua oasei tau Yesus oahata, “Upu. Tau karisaa anori rapeka runa rea upu ohitio oeu oarihoni Mesir, ano nanie aia sui supa?”

¹³ Reiso Yesus iaisosi sio ua iasau iahata, “Oeumo roe kota. Roe rei, mka osupu ia isa iasao tihu tau potone. Oeu opusui ¹⁴ rotu-tu noi numa wani inusui rei, oyo oasei tau numa upue rei, ‘Upuri nanie ianei naniai wani sui supa tau ia runa ne mampusua nanie oaiso tau karisaa anori rapeka runa rea upu ohitio oeuso oarihoni Mesir.’ ¹⁵ Mka iautuu runa kamar onate roe naue osimo. Roe kamar rei, mka osupu katerau runa pusire warumo matane nea. Roe rei oatanunu osita.”

¹⁶ Reiso uaso oeuo roe kota. Hoka roe oyo, osupu pusire sani Yesu iasau rei. Reiso oatanunu muaine tau karisaa ano rapeka runa noa upu ohitio oeuo arihoni Mesir.

¹⁷ Nene pumono pani sanrei, Yesu ihokai roe kakaranae rei runa ne mampusua hutusa rahana ua rei. ¹⁸ Hoka roe oyo, oaiso. Sio wasoni oaiso, oyo Yesu iasau iahata, "Uasau osimo, ia isa arihoni omi reini waini iaiki ikataku, mka iaheniku osi sio wasoni nanie ohunuku."

¹⁹ Oatinu tau rei, ano runai. Ia isa iasei iahata, "Ia reimo, au te sae rei?" Oyo ia isa honu iasei honu iahata, "Ia reimo, au te sae rei?" rotu-tu pusiso oasei sanrei.

²⁰ Oyo Yesu iasau iahata, "Ia rei mo, ia isa arihoni omi hutusa rahana ua reini. Ia rei, waini inono poroti poe pirune osa runa au. ²¹ Nene manisate mo, au, Tumata Reini, Anahatana Ihitiku, mka ohunuku sani oanutui noi Anahatana ne anamanaya. Ne ia sahoro iaheniku osi sio wasoni nanie ohunuku, ia ne siraka nai osa. Nene iake tau ia rei, pene iamrae nea."

²² Reiso wasoni oaiso, oyo Yesu inana poroti. Inana poroti, oyo iainisi iainaa runa Anahatana iahata, "Uainaa runaya mani Upu Anahatana. Ano mo, ano aia tau nante runa tuamane pusiki utui. Auna manei ereruhu on poe tuamane na auna poroti tanui."

Oyo ikihoi tau hanai, isamai osi ne mampusua, iahata, "Onana poroti rei na oaiki, areini mo, tinaiku."

²³ Ita inana koinanae. Iainaa runa Anahatana iahata, "Uainaa runaya mania Upu Anahatana. Ano mo, ano aia tau nante runa tuamane pusiki utui. Ano ahaye tau anggur huaya."

Oyo irui koinanae rei osi ne mampusua. Sio pusiso oninu mkane-mkane.

²⁴ Iahata, "Areini mo, au we nasi. Mka umataku, we nasi erenia na sio pusiso oanei ata Anahatana iuna tau sio sani masuae itotoe. We nasi rei erenia tau sio panesi.

²⁵ Uasau osimo, mka uniu sanaute rei tewa nea samatoro uniu honu ukatamo tau Anahatana irime tuniai reini."

²⁶ Oyo sio ohete ahinae oainaa runa Anahatana samatoro oeuo roe pupue wani nanae Zaitun.

Petrus iakanihu nanai

²⁷ Yesu sio wasoni oeuo roe pupue wani nanai Saitun oyo wasoni arena tinai tihue oyo iasau osi ne mampusua iahata, "Mka pusimo orumamo oarihoniku. Tau sae? Sio oanutui tau Anahatana ne anamanaya ata Anahatana iasau sanrei,

'Mka uhunu ia mamsakae,

oyo ne rompau pusiso orumaso sakakau.

Sio umau suru ria. Sio umau suru nau.'

²⁸ Ne mka uamahaiku honu, oyo ueu uanaonemo poe oteo Galilea. Mka opusu tau muie."

²⁹ Petrus iasau iahata, "Upu. Masike sio pusiso oeu arihonia iae, mka au mo, ueu uarihonia tewa."

³⁰ Oyo Yesu iasau iahata, "Nene manisate, mka-mka pumono, manue eretunkeko nai ua tewasi oimo, ano asau ata ationa au tewa, rotu-tu nai tonu nea."

³¹ Isopo mtinte, "Upu. Masike umataku runaya iae, manisate, upeneku uasau ata au uationaya tewa!"

Oyo ne mampusua pusiso oasau sanrei sirinia.

Yesus iainisi ria Getsemani

³² Oyo Yesus runa na mampusua oeuo ria nisi wani nanae Getsemani. Hoka ria oyo, iasau osi ne mampusua iahata, “Oru-ruemo mai rei na ueu uanamana runa Anahatana.”

³³ Oyo ikata Petrus, Yakobus, runa Yohanes. Anoi ereuponu. Iahana anoi mtinte nai osa. ³⁴ Iahata, “Anoku mtinte nai osa. Uahana nanie umataku nea. Onapa mai rei runa osaka.”

³⁵ Oyo ieu i hainau mkane, samatoro irike tune poe tuamane. Iainisi tau Anahatana kani ne ukuro rerihoniki. ³⁶ Iahata, “Ama, amaku, ano anei auna pusire. Reiso uainisi arihonia na anana we ukuro rei arihoniku. Ne pene apusu au we maue. Apusu ano ruamu me maue.”

³⁷ Oyo Yesus inuniki pani ne mampusua tonu rei. Isupuso wasopo onekeso. Iasei tau Petrus, “Simon, anekea? Ueu uarihonimo potuina tewasi, ne amaha asaka-saka tewa? ³⁸ Osaka oainisi na pene ia isa ireamo. Ireamo na opalalosa. Manisate, anomo nanie rapusu manisate. Ne okua tewa tau tinaimo ramankaeso.”

³⁹ Oyo ieu iarihoniso honu, nanie iainisi sani sinasi rei honu. ⁴⁰ Iainisi pusi oyo, inuniki honu pani tonuso. Isupuso onekeso honu. Tau sae? Sio matao mtinta. Reiso oanei tewa oasau sapani osi Yesus.

⁴¹ Yesus inuniki mai tanuso nai tonu, oyo iasei iahata, “Onekemo oaranahamo asi? Onekemo erelai nea. Mata huni tewa oyo, oaheni au, Tumata Reini, Anahatana Ihitiku, osi sio wasoni opalalosa. ⁴² Ohanumo roe na iauta. Onoo ia waini iruiku ihokai nea.”

Sio osota Yesus

⁴³ Yesus waini ianamana asi, oyo sira tau Yudas, ia isa arihoni sio hutusa rahana ua rei, ihokai ikata sio hutue. Sio rei orori tunua runa kahitata. Sio onata arihoni sio wasoni osaka okenu makapanau osi Anahatana, sio matuhete Musa ne maunauna runa sio ona Yahudi nesia rei sahoro oaisosi sio rei na nanie osota Yesus. ⁴⁴ Yudas, ia waini iaheni Yesus, iasau osiso naone iahata, “Ia waini oninai, mka umukiki na oatianai. Osotai oyo ororiki. Osakai ia-ia.”

⁴⁵ Yudas ihokai, oyo sira tau ieu i haineke Yesus iahata, “Upu.” Oyo imukiki.

⁴⁶ Imukiki oyo, sio rei osotai runa oaresiki. ⁴⁷ Ia isa waini haineke sio, isaru ne tunue, oyo iseha ia onate arihoni sio wasoni osaka okenu makapanau osi Anahatana ne manorine isa tinai totue hae. ⁴⁸ Oyo Yesus iasei tanuso iahata, “Omi ata kani uaisosiso na pene oatinu tau kupania? Omi ata kani uaisosiso na pene opusu kupania ne maue? Tau rei, orori tunua runa kahitata nanie osotaku?”

⁴⁹ Ranie hatae isa uatuhete, hanroe, poua rei honu uatuhete roe Anahatana ne numa nusue na onoo. Ne osotaku tewa. Ne osotaku sani reini sani Anahatana ne anamanaya ereasau.”

⁵⁰ Oyo sio mampusua pusiso oruma oarihoni Yesus.

⁵¹ Ia honue isa pani rei, irehe nipae mani, ipusu Yesus. Oyo sio nanie osotai,

⁵² ne inosu ne nipae rei, oyo irumai sanakui.

Sio orori Yesus pani ia aihuhue tau sio mamkenu makapanau osi Anahatana

⁵³ Sio orori Yesus pani ia aihuhue tau sio mamkenu makapanau osi Anahatana. Hoka pani oyo, sio onata arihoni sio wasoni osaka okenu makapanau osi Anahatana, sio matuhete Musa ne maunauna, runa sio ona Yahudi nesia rei pusiso oamanouso. ⁵⁴ Petrus ipusu Yesus on ria hainau rotu-tu inusui pani mitanunue arihoni ia aihuhue rei ne numa nene pakelo. Hoka pani oyo, iru-ruai iasa tinaini haineke usa ikata sio mamsakaya. ⁵⁵ Sio onata arihoni sio wasoni osaka okenu

makapanau osi Anahatana runa sio pusiso on sinasi rei onina sio umau na osima runa Yesus ne isanaya na oruiki osi sio wasoni no kawasa ohunui. Ne osupu ne isanae isa tewa. ⁵⁶ Sio panesi ohoka oruni oakarota rerihoni Yesus, ne sio no mamrunia osa tewa. Pusiso oruni tamena-tamena. Reiso no kawasa tewa na oaisosi sio ohunui.

⁵⁷ Oyo sio umau ohitio roe, samatoro oruni oakarota rerihoni Yesus oahata, ⁵⁸ “Ami atinui iasau iahata, ‘Mka ukohu Anahatana ne numa mainisie reini, sio ruao onanai, oyo onona ua, uapuoo honue. Areimo sio ruao oapuooi tewa.’”

⁵⁹ Aikee sio no mamrunie osa tewa.

⁶⁰ Reiso ia aihuhue iooi kua tihue, oyo iasei tau Yesus iahata, “Sio rei oruni kahatene rerihonia. Ne ano asau sae isa tewa?”

⁶¹ Ne Yesus iamaturui mani. Iasau sae isa tewa. Oyo ia aihuhue iasei honu iahata, “Ano mo, la waini Anahatana Iratia lapuheu Mansia, ia sahoro ita iainaa runai anai?”

⁶² Iahata, “Au wani rei nea rei tea. Mka pusimo onoo au, Tumata Reini, Anahatana Ihitiku, urue mai la waini Ne Kawasa hanai wanane. Mka uhokaku honu runa yahu on roe nante.”

⁶³ Iatinu sanrei, oyo ia aihuhue ikiha ne papite na sio oanei ata anoi eresaa tau Yesus. Iahata, “Kahuræ sio oruni oamanarui tewa nea. ⁶⁴ Omi ruamo oatinui ianamana sani ia Anahatana. Oapamata sou sapani?”

Sio pusiso oapamata sou ata Yesus isana, reiso kahuræ ohunui. ⁶⁵ Oyo sio umau ohuto Yesus, onete matai usena na inoo mosa tewa, oyo ohitai oaumaniki oasau osiki oahata, “Masi asau. Ia seia ihitaya?”

Sio mamsakaya oroho Yesus panesi oi.

Petrus iauhaa ata iationa Yesus

⁶⁶ Petrus waipani naniai rei asi, oyo ia pina makahaie tau ia aihuhue tau sio mamkenu makapanau osi Anahatana ihokai mai. ⁶⁷ Inoo ata Petrus waini iasa tinaini haineke usa, oyo iarinii uai anoe ia-ia, samatoro iasei iahata, “Ano sahoro akata ia Nazaret rei oi rei tea. Ia Nazaret waini nanai Yesus tea?”

⁶⁸ Iahata, “He. Uationai tewa. Uanei tewa. Ano wani asau runa sae rei?”

Oyo Petrus ieuu pani mitanunue.

⁶⁹ Ia pina makahaie rei inoo Petrus, oyo iasau osi sio pani rei, “Manisate, ia reini, ia isa arihoni sio.”

⁷⁰ Iahata, “Au? Uationai tewa.”

Oyo sira tau sio pani rei oasau osi Petrus oahata, “Nene manisate, ano mo, ano isa arihoni sio rei. Tau sae? Ano arihoni otoa Galilea!”

⁷¹ Oyo Petrus isopa ruai iahata, “Anahatana nanai. Uationa ia rei, ia waini omi oanamana runai, tewa.”

⁷² Mata huni tewa oyo, manue eretunkeko honu. Eretunkeko nai ua nea. Oyo Petrus anoi erepeka runa Yesus ne anamanae. “Mka manue eretunkeko nai ua tewasi oi, ano asau ata ationa au tewa nai tonu nea.”

Reiso Petrus irani anoi repunoko pusiki.

Yesus iamanane Pilatus

15 ¹ Nene omnano tunne sanrei, sio pusiso, sio onata arihoni sio wasoni osaka okenu makapanau osi Anahatana, sio matuhete Musa ne maunauna runa sio ona Yahudi nesia rei oapamata sou. Okanihoo Yesus, oyo ororiki nanie oruiki osi Pilatus, ia waini ne kawasa tau otoa rei. ² Ororiki oyo, Pilatus iasei tanui iahata, “Areimo manisate? Ano sahoro auna natu tau sio Yahudiu?”

Iahata, “E-e. Areimo sani ano wamo asau rei tea.”

³ Sio onata arihoni sio wasoni osaka okenu makapanau osi Anahatana oamanaru Yesus. Oahata, “Ia reimo, ne masanau panesi.”

⁴ Reiso Pilatus iasei honu tau Yesus. Iahata, “Ano asau sae isa tewa? Masi anoo, sio wasoni osima sapani runaya.”

⁵ Ne Yesus iamaturui mani. Pilatus inoo sanrei isira.

⁶ Tau karisaa sio anoo rapeka runa noa upu ohitio oeu oarihoni Mesir, Pilatus isaka ihoka-hoka ia isa arihoni pui anoe waini sio oainisiki. ⁷ Pani pui anoe ia isa waini nanai Barabas. Ikata sio wasoni oatana runa sio kupaniau, reiso ohunu sio umau. ⁸ Reiso sio hutue ohokaso, oyo oainisi arihoni Pilatus sanrei, “Upu. Ami ainisi arihonia na ahoka ia isa arihoni pui anoe sani sui osa tau karisaa reini.”

⁹ Pilatus iasei tanuso iahata, “Onina na uhoka ia natu tau omi Yahudiu osimo?”

¹⁰ Iasei sanrei tau inoo ata sio onata arihoni sio wasoni osaka okenu makapanau osi Anahatana orui Yesus osiki tau sio wasoni oanana.

¹¹ Ne sio onata rei oasau osi sio hutue rei oahata, “Oainisi na ihoka Barabas. Pene oainisi na ihoka Yesus.”

Reiso sio oainisi Barabas. ¹² Oyo Pilatus iasei honu tau sio hutue rei iahata, “Reiso omi onina na au una sae runa ia reini waini omi oaoiki tau natu tau omi Yahudiu?”

¹³ Oakapona, “Pakui roe hini wani reniene!”

¹⁴ Iasei, “Tau sae? Ia ne isanae sae?”

Oyo oakapona erenesi sinasi oahata, “Pakui roe hini wani reniene!”

¹⁵ Pilatus inina na sio anoo iaka reiso ihoka Barabas osiso. Oyo iaisosi sio umau osapu Yesus tau awane unia. Osapui samatoro iruiki osi sio umau na opakui roe hini wani reniene.

Sio opaku Yesus roe hini wani reniene

¹⁶ Sio soratatua orori Yesus pani ia onate arihoni kupania ne numa, oyo oanaha runa sio no tikane soratatua pusiso. Oanaha runaso, oyo oamanouso. ¹⁷ Sio nanie oaumani Yesus tau sio oaoiki tau natu. Reiso oausahu papi msinae osiki, oyo opepe awane unie wani nonae, samatoro oausahui roe unui. ¹⁸ Oyo oatapeai. Oahata, “Arue nai-naimu, natu tau sio Yahudiu.”

¹⁹ Ohita-hita unui tau ai sanae, oyo ohuto-hutoi, samatoro orike tune mai Yesus sani oamuirai. ²⁰ Oaumaniki pusi, oyo onosu papi msinae rei, oyo oausahu ruai ne papite osiki honu. Oyo ororiki pani manahane nanie opakui roe hini wani reniene.

²¹ Sio otentene tau Simon, ia Kirene, na ihana hini osi Yesus. Ia rei Aleksander runa Rufus amai. Ia mato ihokai on pani niane, nanie inusui roe kota. ²² Reiso orori Yesus roe pupue wani nanae Golgota. Golgota nene manariti mo, unuke kanie.

²³ Hoka roe oyo, nanie oruiki ininu anggur nene sanaute wani onehui runa mur, na pene iahana tinaini ereina. Ne ipenei ininui. ²⁴ Oyo opakui roe hini wani reniene rei, samatoro opesi hatu kania, nanie osama Yesus ne apia osi ruao. ²⁵ Opakui roe hini tau ranie erehiti-hiti. ²⁶ Oaunutu roe hini, roe unui, ia ne isanae sapani. Okanu, “Natu tau sio Yahudiu.” ²⁷ Opaku Yesus runa sio kimanakana ua roe hini wani reniene oi. Opaku ia isa mai Yesus hanai wanane runa ia isa mai hanai pante. ²⁸ Ouna sani Anahatana ne anamanaya raasau, “Oahata ia rei, ia isa runa sio kahatena.”

²⁹ Sio wasoni onikusio, okoka unuo oaumaniki, oyo orati osohiki, oahata, “He. Ano asau ata mka akohu Anahatana ne numa mainisie, oyo onona ua, oyo apuooi honu. ³⁰ Masi asipua arihoni hini na apuheu ruamu.”

³¹ Sio onata arihoni sio wasoni osaka okenu makapanau osi Anahatana runa sio matuhete Musa ne maunauna oaumaniki oi. Oahata, “Iapuheu sio panesi ne ianei

iapuheu ruai tewa. ³² Kani ia rei waini natu Israel, la Anahatana Iratiki Iapuheuso, kahuraa isipui arihoni hini rei na inoo runa iparisaa tanui.”

Sio ua wasoni opakuso roe hiniu okatai rei iae, orati sohiki oi.

Yesus imatai

³³ Tau ranie katopu, oyo ranie hatae rei erepumonoi pani otoa rei rotu-tu ranie ereuni. ³⁴ Oyo Yesus iakapona nioi mainae tau ia ne sou, “Eloi, Eloi lama sabakhtani?” Nene manariti, ‘Upuku. Anahatana. Aeu arihoniku, nanie tahae?’

³⁵ Sio umau pani rei oatinui ioi sanrei, reiso oasau oahata, “Masi oatinu. Ioi Elia.” Elia mo, masuae ia waini ia mamsima runa Anahatana ne maunauna.

³⁶ Ia isa pani rei irumai inana nokasa sanae. Inonoi poe sanau maninue, samatoro isumai tau ai sanae rurue. Oyo isopai roe Yesus sihurui, inina na Yesus ininu sanaute rei. Isopai roe iahata, “Napa ee. Mai, na inoo ata kani Elia ihokai iratiki arihoni hini wani reniene rei te tewa.”

³⁷ Oyo Yesus iakapona mainae, samatoro nahai erenkui.

³⁸ Nipae wani erenete mitanunue poe Anahatana ne numa mainisie rei wakihai. Eresamai tau ua on roe rurue rotu-tu poe rurue. ³⁹ Ia kapitane tau sio soratua utuni ioo mai hini rei uae iatinu Yesus iakapona runa inoo Yesus imatai sapani, iahata, “Nene manisate, la reini mo, Anahatana anai.”

⁴⁰ Sio pinau umau wasoni pani rei oi. Sio wasoni oasumata pusire on hainau. Sio rei mo, Salome, Maria arihoni nia Magdalena, runa Maria (Yoses runa Yakobus, ia honue, inai). ⁴¹ Tonuso opusu-pusu Yesus. Sani ihokai pani otoa Galilea oakahaiki. Pani rei iae wasoni sio pinau panesi oi. Sio rei ohokaso mai Yerusalem okata Yesus.

Sio oanutu Yesus

⁴² Ranie hatae rei, areimo ranie hatae sio oatanunu tau hanroe. Tau sae? Hanroe, areimo ranie hatae rei iaranahata. Tau ranie manne nea ⁴³ Yusuf arihoni nia Arimatea ihokai. Ia rei mo, ia osa arihoni sio ona Yahudiu. Sio panesi oationai runa oamuirai. Ia oi waini inapa ranie hatae rei sio pusiso mai tuniai reini opusu Anahatana ne maue tau sio oanei ata ia mo, ia Natu. Reiso Yusuf iapamese anoi, oyo ihokai mai Pilatus nanie iainisi Yesus hatai. ⁴⁴ Pilatus iatinu ata Yesus imatai nea, isira. Reiso iaisosi ia isa ioi ia kapitane tau sio soratua utuni rei. Hoka mai oyo iasei tanui iahata, “Yesus imatai nea?”

⁴⁵ Iahata, “E-e, upu. Imatai nea.”

Oyo Pilatus iamanaku. Iasau osi Yusuf iahata, “Anana hatai rei.”

⁴⁶ Oyo Yusuf ihane nipa iake isa, samatoro iaputunu Yesus, oyo iopai tau nipae rei. Oyo inusu hatai rei pani hatu nohue. Hatu nohue rei mo, ounai arihoni hatu tatepie. Inusu tihane hatae rei, samatoro ikamauni hatu mainae isa erenete hatu nohue rei nene mitanunue. ⁴⁷ Maria, ia Magdalena, runa Maria, Yesus inai, oasumata sio oanutui.

Yesus iamahaiki Honu

16 ¹ Ranie hatae rei iaranahata erenkui nea, oyo Salome, Maria (arihoni nia Magdalena) runa Maria (Yakobus inai) tonuso oeu ohane hau rihue nanie osonai roe Yesus tinaini. ² Tau omnano tunne, ranie hatae mataanoa tau minggu nunue rei, oeuo poe hatu nohue tau ranie eresaa nea. ³ Oasei tau umau oahata, “Ia seia mka iakahaita na ikamauni hatu wani erenete hatu nohue nene mitanunue?”

⁴ Hoka poe oyo, onoo roe uae, samatoro onoo ata sio okamauni hatu rei arihoni mitanunue nea. Hatu rei mainae nai osa. ⁵ Reiso onusu pani hatu nohue rei,

samatoro sira tau onoo ia honue isa iru-ruei mai hanao wanana. Ia waini iausahu papi putie. Onoo ia honue rei, reiso osira hunu ruao. ⁶ Ia honue rei iasau osiso iahata, "Pene osira. Onina Yesus arihoni nia Nazaret. Ia waini sio opakui roe hini wani reniene. Waini tewa nea. Waini iamahaiki honu. Masi onoo, naniai wani oaunutui wapo rei. ⁷ Masi oeu oruni-runi osi Petrus runa sio mampusua pusiso. Osima osiso oahata, 'Yesus waini ieu ianaonemo poe otoa Galilea nea. Poe rei omi mka onooi sani naone iasau osimo rei.'"

⁸ Reiso ohokaso arihoni hatu nohue rei, oyo orumaso. Tea mo, osira runa okaitau. Oasau sae isa tewa osi ia seia mani oi. Tea mo, okaitau hunu ruao.

Yesus iatuhete Ruai Osi Ne Mampusua

⁹ Yesus iamahaiki honu tau omnano tunne tau ranie hatae mata anoe arihoni minggu unue rei. Mataano, iatuhete ruai osi Maria, ia pina Magdalena. Naone, Yesus inei sakahatena itu arihoniki. ¹⁰ Reiso Maria, ia pina Magdalena rei, ieu isima ata inoo Yesus waini iamahaiki honu. Isima osi sio wasoni naone okata Yesus. Sio rei wasoni orani oasanoata. ¹¹ Ne oatinu ata Yesus waini iamahaiki honu, oatinu ata Maria inooi nea, oparisaa tewa.

¹² Oyo Yesus iatuhete ruai osi ne mampusua ua. Uaso onooi tamene. Onooi pannuhu wasoni oeuso mai nisiu. ¹³ Reiso onuniso, oyo oruni osi no netau. Oahata, "Ira oe. Ami anoo Yesus waini iamahaiki honu!"

Ne no netau reimo oparisaa tewa sirinia.

¹⁴ Tau muie Yesus iatuhete ruai osi ne mampusua hutusa rahana osa pannuhu wasoni oaiso. Iasau nioi mainae. Tea mo, sio opisa unuo tewa runa unuo onata reiso oparisaa tewa wasoni oruni-runi. Oruni ata onoo nea ata Yesus waini iamahaiki honu. ¹⁵ Oyo Yesus iasau osiso iahata, "Oeu ohori niana-niana pusire mai tuniai rei. Oaunau tau Sou lake wani on roe Anahatana. Oaunau sio pusiso mai tuniai reini. ¹⁶ Ia seia waini iparisaa, oyo osohui na sio oanei ata Anahatana iheu ne rosau nea, Anahatana iapuheui na iruei haineke Anahatana rotu-tu ria supani. Ne ia seia iparisaa tewa, mka Anahatana iaisosiki ieu hainau arihoniki. ¹⁷ Sio wasoni oparisaa, mka ouna sima-simana sani onei sakahatena tau au we kawasa, oanamana tau sou waroni ruao oaneire tewa. ¹⁸ Munata orime tekene te oninu minne, sio rei okupu tewa, omata tewa. Munata oahusie sio kupua tau hanao, mka sio kupua rei iake. Okupu tewa nea."

¹⁹ Upuri Yesus iaunau pusi, oyo Anahatana iapusaai na roe noiyaha. Roe rei, Yesus isupu kawasa reiso iruei mai Anahatana hanai wanane. ²⁰ Reiso sio mampusua oeu oaunau tau Anahatana ne maunauna sui niana-niana mai tuniai reini pusiki. Upuri ikahaiso oi na ouna sima-simana. Tau rei, sio pusiso oanei ata no anamanaya manisata.